

SIAUW NGO GIE

SAMBOENGAN DARI:

„SIAUW NGO GIE”

BAGIAN PERTAMA

◆
BAGIAN KA-DOEA
(TAMAT)

=====
DJILID KA 2
=====

Karangannja :

WEN KUANG LOU

&

FENG MI TAO-JEN

◆
1930

PENERBIT :

N. V. HANDEL MIJ & DRUKKERIJ


— KENG PO — BATAVIA —

SIAUW NGO GIE

Bagian ka-doea.

atawa

Pembrontakannja Siang Yang Ong.



SIAUW NGO GIE

Bagian ka-doea

atawa

Pembrontakannya Siang Yang Ong

„Kaloe kae soeda taoe terlebih baek lagi,” kata Kang Hwan sembari tertawa.

„Itoe waktoe akoe kiraken dengan sasoenggoenja kae mae berantem sama orang, tida taoenja kae lantas maboer, Bagoes betoel! Tapi, kae kapannja sampe ka ini?”

„Kamaren. Pada sasoedanja akoe menanjaken pikiran Siang-ya, akoe lantas oeroes sedikit pakerdjahannya akoe poenja lo-ja; tapi masi ada bebrapa soerat jang masi belon ditoelis beres dan besok pagi-pagi akoe baroe bisa berangkat poelang. Baroesan akoe denger telah dapet ditangkep doewa pendjahat jang hendak melakoe-ken pemboenoehan, maka akoe lantas masoek boewat meliat, tida taoenja ada marika itoe. Marika telah berboewat apa-apa jang berboedi padakoe. Maka akoe harep kae soeka mintaken keadilan pada siangya, pada sasoedanja dikasi hoekoeman katjip, akoe mae sediaken doewa peti mati, sekedar menjataken akoe poenja trima kasi atas iaorang poenja boedi kabaekan.”

„Oleh kerna kae ada mempoenjai maksoed begitoe,” kata Tie Hoa, „akoe sendiri poen merasa sanget sajang atas marika berdoewa poenja kadjoedjoeran, di antara golongan liok-lim jang berhati djoedjoer seperti iaorang, sasoenggoenja djarang sekali bisa didapetken. Akoe rasa tjoe-

ma sebab iaorang terkena oborannya Lie Thian Siang dan pengaroehnja pikiran jang hendak bikin pembalesan atas sakit hatinja iapoenja ajah. Lagian ia disangoepin boewat mendapet pangkat dan kaberoentoengan di hari kamoedian, dengan begitoe, soeda tentoe sadja iaorang maœe bakerdja dengea sagenep tenaga dan hati.

„Kaloe diliat dari perkara iaorang bertanding sama Pwee Houw boewat menoeloengin kae, boleh dibilang ada saorang jang baek. Akoe maœe pergi masoek lagi ka dalem boewat mintain ampoen pada Siangya, barangkali sadja Siangya soeka memandang akoe poenja moeka dan mengampoenin iaorang poenja djiwa.“

Djoestroe ia berdoewa lagi bitjara, di lataran orang lagi menggelar salembar tiker dan itoe doewa soedara Heng didorong kaloewar dari kamar boekoe boewat mendjalanken iaorang poenja hoekoeman.

„Toewan-toewan djangan toeroen tangan doeloe,“ kata Tie Hoa. „Akoœ maœe masoek ka dalem boewat mintain iaorang ampoen pada Siangya, barangkali sadja akoe poenja maksoed bisa berhasil,

„Sahabisnja berkata ia lant as masoek ka dalem kamar dan berloetoet di hadepan Pauw Kong.

„Akoœ harep Siangya soeka brentiken doeloe itoe napsœe kagoesaran,“ kata ia.

„Tie Tjongsoe boleh berbangkit sadja,“ kata Pauw Kong. „Kaloe ada pembitjarahan boleh dibitjaraken dengan plahan-plahan.“

Tie Hoa lant as toetoerken apa jang soeda terdjadi, moelai dari perkara katemoeken Pek Ngotay-tay hingga perkara itoe doewa orang menoeloengin Kang Hwan. Achirnja ia berkata :

„Akoë harep Siangya soeka timbang, perkara mem-
bales sakit hatinja iapoenja ajah, itoelah perboe-
watan jang berbakti, membales kabaekannja Lie
Thian Siang, itoelah perboewatan jang patoet.
sedeng perkara menoeoengin pada Kang Hwan,
itoelah kaloewar dari iapoenja hati jang tida tega.

Biar poen iaorang telah dateng ka sini boewat
bermaksod djahat pada Siangya, tida bisa dika-
taken orang jang terlaloe djahat. Apabila Siangya
bisa mengasi kalonggaran loewar biasa, mengam-
poenken iaorang poenja kadosahan dari hoekoe-
man mati, nistjaja iaorang aken merasa sanget
bersoekoer dan djoengdjoeng tinggi Siangya poe-
nja boedi kabaekan jang besar. Boewat memba-
les boedinja Lie Thian Siang sadja iaorang maoe
melakoeken itoe pakerdjahan dengen mengorban-
ken iaorang poenja djiwa. Apabila Siangya me-
ngampoenin pada marika dan trima bakerdja di
Kay-hong-hoe, akoë taoe iaorang tentoe soeka
membales Siangya poenja boedi kabaekan, biar
poen marika poenja badan moesti djadi antjoer
dan leboer. Bersama ini, akoë saorang jang sanget
rendah, braniken hati madjoeken itoe advies dan
bermoehoen Siangya poenja timbangan jang ma-
ha adil.”

Pauw Kong lantas manggoetken kapalanja.

„Och, kiranja begitoe.” kata ia. „Sabaliknja akoë
jang soeda kaboeroe napsoe mendjadi goesar.”

Sahabisnja berkata ia lantas prentah soepaja
itoe doewa orang dibawa masoek lagi ka dalem
kamar. Ong Tiauw lantas pergi kaloewar boewat
bawa lagi itoe doewa soedara Heng masoek. Tapi
iaorang tetap tinggal berdiri djedjak dan tida
maoe berloetoet.

„Baroesan,” kata Pauw Kong. „lantaran akoë
merasa sanget goesar, soeda tida menanjaken

lebih djaoe kaeo berdoewa poenja asal-oesoel dan apa sebabnja maka maoe memboenoeh pada-koe. Tjobalah sekarang kaeo orang tjeritaken dengan terang."

"Kita berdoewa ada mempoenjai sakit hati jang sanget besar pada kaeo," kata itoe doewa orang, „jaitoe pemboenoehan atas dirinja kita poenja ajah. Saorang lelaki jang hidoep dalem ini doenia, apabila tida bisa membales sakit hatinja iapoenja ajah, boleh dibilang masi lebih rendah dari satoe binatang."

„Kaeo berdoewa sasoenggoenja ada bangsa kasar dan pendek pikiran," menjelak Tie Hoa dari satoe pinggiran. „Sabenernja kaeo orang kena disesatkan oleh Lie Thian Siang dengan iapoenja tjerita djoesta, tapi sebaliknja kaeo maoe pertjaja itoe obrolan kosong. Ia sengadja obor-obor kaeo berdoewa dengan itoe tjerita djoesta soepaja kaeo orang dengan ridla hati dateng melakoeken pemboenoehan di sini, dan inilah jang dinamaken pindjem tangan boewat memboenoeh orang.

„Tatkala itoe dorna bitjara sama kaeo orang, akoe poen mendengerin di sabelah loewar. Kata-nja kaeo poenja ajah telah diboenoeh mati oleh Tian Him Hoei, apa boekannja begitoe?"

„Ja, bener begitoe," kata itoe doewa soedara Heng dengan berbareng. „Tapi ada lagi soeatoe hal laen. apa kita poenja oewang djoega kaeo jang tjolong."

„Itoe oewang akoe jang ambil," menjelak Kok In Hoei, „Kaeo orang djangan terka orang jang tida berdosa."

„Kaloe begitoe," kata Heng Djoe Liong, „sabenernja kita poenja ajah tjara bagimana matinja?"

Tie Hoa lantas toetoerken apa jang ia soeda denger dari Thio Liong. Achirnja ia berkata : „Apabila kae tida pertjaja akoe poenja omongan ini, sekarang di hadepannja Siangya dan sekalian Hauw-wie-lo-ja, kae boleh tanjakan apa be-toel atawa tida doedoeknja perkara begitoe roepa.“

„Tie Tjongsoe poenja omongan sedikit poen tida salah,“ kata Pauw Kong. „Djadinja kae berdoewa lantaran itoe oeroesan dateng ka sini boewat melakoeken pemboenoehan padakoe? Tapi akoe poen tida mae terlaloe salahken padamoe, dan djoegs tida mae binasakan kae poenja djiwa, kerna menginget kae berdoewa ada anak jang berbakti. Sekarang akoe mae melepaskan kae pergi dari sini. Atas kae poenja perboewatan jang kliroe, apa mae dirobah atawa tida, itoelah menoeroet sebagaimana kae orang soeka ; tapi kaloe kae orang tida mae merobah itoe kasalahan dan kena tertangkep lagi oleh akoe, pasti sekali akoe tida nanti mengasi lagi kaentengan seperti sekarang. Oppas-oppas, lepaskan ini doewa orang poenja iketan.“

Ong Tiauw dan Ma Han dateng menghamperi dan melepaskan tali iketannja itoe doewa soedara Heng, hal mana soeda membikin iaorang djadi melongo dan tida taoe apa jang marika moesti berboewat.

„He, mengapa kae orang tida hatoerken trima kasi pada Siangya“, kata Tie Hoa, „jang soeda melepaskan kae poenja djiwa dari bahaja maet?“

Heng Djoe Liong dan Heng Djoe Houw terpaksa berloetoet di hadepan Pauw Kong dan berkata dengan berbareng : „Lantaran kita berdoewa poenja kabodohan, ampir sadja menjila-

kai Siangya poenja djiwa. Sekarang sekalipoen kita berdoewa poenja kadosahan ada begitoe besar, toch Siangya soeda berlakoe begitoe moerah tida maoe menghoekoem pada kita. Kita berdoewa poenja djiwa boleh dibilang Siangya jang hidoepken kombali”.

„Mengapa kae orang tida maoe minta pakerdjahan di Kay-hong-hoe pada Siangya, agar kae bisa membaes Siangya poenja boedi kabaekan ?” menjelak Tie Hoa dari pinggir.

„Kita orang telah menerima orang poenja permintahan toeloeng jang begitoe soenggoe-soenggoe”, kita Heng Djoe Liong, „apabila sekarang kita bekerdja di Kay-hong-hoe, boekantah aken dikatakan orang sabagi manoesia hina jang sabentar-bentar ganti boeloe? Pribahasa ada bilang: mantri jang setia tida nanti bekerdja pada doewa madjikan”.

„Kae sasoenggoenja ada bangsa kasar”, kata lagi Tie Hoa. „Doeloe Han Sin moelai bekerdja pada Tjouw Pa Ong sebagai satoe soldadoe penoenggoe kantoer, tapi blakangan di bawah prentahnja Han Ong beroelang-oelang ia membikin djasa besar, hingga ia diangkat mendjadi Sam Tjee Ong. Apatah ia itoe boekannja mantri jang kerdja pada doewa madjikan? Ini waktoe ada koetika jang sanget baek. Tida lama kamoe-dian Gan An-ie Taydjinn aken poelang ka kota radja, apabila kae bekerdja di Kay-hong-hoe, asal sadja Siangya mengaloewarken satoe pata perkatahan, nistjaja kae lantas bisa mendjabat pakerdjahan negri. Kae djangan dengeri obrolan Lie Thian Siang, jang mengataken Bang Thay-soe maoe menoeloeng soepaja kae mendjabat pakerdjahan negri. Sebab, ini waktoe ia sendiri masi moesti berdiam di roeinahnja mami-

kirken iapoenja kasalahan, tjara bagimanatah ia bisa menoeloeng kaoe-orang?"

Itoe doewa soedara Heng pikir Tie Hoa poenja omongan ada benar sekali. Sang ade lantas berkata: „Engko, baeklah kita memoehoen Siang-ya poenja pertoeloengan.“

Itoe doewa soedara lantas berloetoet kombali dan mendjoera beroelang-oelang sampe kapalanja mengenakan djoebin serta minta dikasianin. Maoe atawa tida, terpaksa Pauw Kong manggoetken kapalanja dan trima itoe doewa orang. Sabetoelnja kaloe tida ada itoe perkara menoeloenjin Kang Hwan, pasti sekali iaorang poenja djiwa lebih siang soeda katemoeken Giam-koen. Maka orang selamanja haroes lakoeken perkara baek dan patoet.

Pauw Kong soeroe itoe doewa orang menoekar pakean, sebab iaorang masi pake itoe pakean boewat djalan malem. Oleh kerna iaorang poenja pakean memang ada terboengkoes dalem iaorang poenja pauwhok, djadi tida soesa lagi boewat marika toekaran. Kok In Hoei lantas berpamitan boewat berangkat poelang. Pauw Kong tida kasiken ia poelang, sebab maoe di-poedjiken pada baginda keizer soepaja dikasi pegang djabatan negri.

Tapi Kok In Hoei beroelang-oelang menoelak dan iapoenja sikap ada begitoe pasti. Koe-tika Pauw Kong kasi ia persen oewang djoe-ga ia tida maoe trima. Pauw Kong taoe ba-hoewa tabeatnja ini orang sangat loewar biasa, maka ia soeroe orang sediaken satoe medja santapan dan minoeman, ditemenin oleh sekalian Hauwwie. Kamoedian ia menanjaken pada Tie Hoa tentang ka'adahan di kota Siang-yang dan radja-moeda Siang-yang Ong. Tie Hoa lantas

toetoerken dengan ringkes prihal oeroesan mametjahken Tong-tong-tin, sedang itoe prins ka mana ia soeda pergi tida ada saorang jang taoe. Lantaran itoe waktoe soeda laat, Tie Hoa lantas berpamitan sama Pauw Kong dan menoedjoe ka tempatnja itoe hauw-wie-hauw-wie, di mana ia bersama Kok In Hoei doedoek makan-minoem dengan ditemenin oleh Ong Tiauw dan Ma Han. Soeda tentoe sadja ada teritoeng djoega itoe doewa soedara Heng.

Di hari jang berikoetnja Kok In Hoei melandjoetken iapoenja peidjalanan, sedang Tie Hoa jang soeda poedjiken Heng Djoe Liong dan soedara moedanja bakerdja di Kay-hong-hoe, itoe waktoe ia djadi menjesal. Sebab ia pikir, laoetan jang bagaimana dalemnja masi bisa didjadjakin, tapi manoesia poenja hati soeker sekali dikatahoei sampe abis. Apa tjilaka kaloe itoe doewa orang pikirannja berobah lagi, sedeng iapoenja ka'adahan ada begitoe berdeketan sama Pauw Kong, djika sampe terdjadi perkara jang di loewar doegahan, ia tida bisa terlepas dari itoe tanggungan, Apa boleh hoewat ia moesti tinggal berdiam di Kay-hong-hoe, soepaja saban waktoe bisa menilik itoe doewa orang poenja kalakoean. Pauw Kong jang sadari masi pagi soeda masoek ka kraton, koetika ia kaloewar dari astana dan masoek ka dalem iapoenja kamar-boekoe, lantas ada satoe oppas jang mergasi taoe bahoewa samalem di dalem roemah penggadean merk Heng Hin, jang letaknja di sabelah Timoer dari Kou-lauw, telah terdjadi perkara djiwa besar, sama-sekali ada toedjoe orang jang mendjadi korban pemboenoehan.

FATSAL VII.

Itoe orang-orang jang terboenoeh, doewa di antaranja toekang meronda malem, sedang jang laennja semoewa ada penggawe dari itoe roema penggadean, jang terboenoeh di iaorang poenja kamar. Ini pagi tikoan dari district Siang-hoe dengan membawa toekang preksa mait dan bebrapa oppas telah bikin papreksahan ka itoe roemah penggadean.

Dari hasilnja papreksahan, ternjata loeka-loekanja orang-orang jang terboenoeh berwarna merah, jang menandakan ada perboewatannja orang-orang jang soeka djalan malem. Itoe pendjahat atawa pendjahat-pendjahat telah mengambil djalan masoek dari tembok Timoer dan masoek ka dalem itoe roemah penggadean. Oewang jang ditjoeri sama-sekali berdjoembla saratoes tael perak lebih. Sekarang itoe tikoan telah dateng mengadep dengan membawa sala satoe leerling pengawe jang bernama Lie Siauw Djie. menenggoe Siangya poenja papreksahan.

Pauw Kong pikir, ini kombali ada perkara gelap. Itoe oppas lantas kaloewar boewat melakoeken prentahnja iapoenja madjikan. Tida lama kamoedian itoe tikoan soeda masoek ka dalem itoe kamar boekoe, dan lantas membri hormat pada Pauw Kong lantas oendang ia berdoedoek, kamoedian menanjaken prihal itoe pemboenoehan di roemah penggadean merk Heng Hin. Itoe tikoan lantas toetoerken seperti jang telah diloe-kiskan di atas tadi. Kamoedian ia hatoerken procesverbaalnja itoe leerling pengawe boewat dipreksa oleh Pauw Kong, berikoet satoe staat papreksahan tentang loeka-loekanja itoe orang jang terboenoeh.

„Apa Koei-koan ada bawa djoega itoe orang-orang dari itoe roemah panggadean?“ menanja Pauw Kong.

„Ja, ada : sekarang ada di loewar menoenggoe Losoe poenja papreksahan,“ saet itoe kapala district.

... Tan Sioe Djin poen ada mendjadi Pauw Kong poenja moerid. Doeloean itoe djabatan dipangkoe oleh Tji Koan, tapi ia itoe sekarang soeda naek pangkat mendjadi tihoe di Tji-tjioehoe dan djabatannja digantiken oleh ini Tan Sioe Djin, jang djoega ada kaloewaran sekolahan dan sanget djoedjoer dan bersih kalakoeannja. Lantaran ini perkara ada sanget soeker dan djiwa jang terboenoh poen banjak, maka ia rapportken pada Kay-hong-hoe.

Pauw Kong soeroe oppas bawa masoek doeloe pengeroes itoe panggadean jang tersangkoet. Tida lama kamoedian bibawa masoek saorang jang berpakean idjo dan memake kopiah ketjil. Pauw Kong liat iapoenja roman sabar dan baik, jang ada soeroep sama ka'adahannja orang dagang, sedikit poen tida teroendjoek sikap jang djahat atawa galak.

„Akoel, Ong Tat, memberi hormat di hadapan Siangya,“ kata itoe orang.

„Tjoba kae tjeritaken apa jang kae taoe berhoeboeng dengan itoe perkara pemboenohan dalem itoe roemah panggadean jang terdjadi samalem,“ kata Pauw Kong.

„Samalem koetika pendjahat masoek,“ kata Ong Tat, „kita orang djoestroe lagi pada tidoer di sabelah depan, djadi sama-sekali tida taoe apa jang soeda terdjadi di kamar blakang, di mana sama-sekali ada tidoer anam panggawe. Lima di antaranja telah terboenoh mati, dan

tjoema itoe satoe sadja jang masi tinggal hidoep. Menoeroet katanja itoe leerling penggawe jang masi hidoep, pendjahat jang masoek sama sekali ada doewa orang, dan segala pembitjarahannja doewa pendjahat itoe semoewa ia telah denger dengan terang. Romannja poen ia telah liat dengan njata."

Pauw Kong prentah bawa Ong Tat kaloewar, bawa masoek itoe teerling penggawe. Koetika itoe orang masoek, ternjata masi moeda sekali, paling banjak baroe sembilan belas tahon. Iapoenja kepala terboengkoes oleh satoe sapoetangan batis. Ia berloetoet di hadapan Pauw Kong boewat menoenngoe papreksahan.

„Siapa kae poenja nama?" menanja itoe ambtenaar.

„Lie Siao djie," djawab itoe leerling penggawe.

„Soeda brapa lama kae bekerdja dalem itoe roemah penggadean?"

„Kira soeda tiga tahon lebih."

„Kenapa kae poenja kepala di'iket? Apa mendapet loeka?"

„Tida dan maka diboengkoes lantaran sakit kepala. Kaloe boekannja lantaran sakit kepala, boleh djadi djoega akoe soeda kena diboenoe oleh itoe doewa pendjahat."

„Kenapa djadi begitoe?" menegesken Pauw Kong.

„Kamar blakangnja itoe roemah penggadean," menerangkan Lie Siao Dji, „tida ada tempat ti-door jang di dalemnja di-angetin sama api, hannya tjoema memake randjang biasa sadja, atawa memasang papan-papan di atas doewa bangkoe. Laen dari itoe ada terdapet djoega satoe lemari jang berbareng digoenaken seperti medja. Akoe lantaran sakit kapala dan takoet katioep angin,

sebab sedikit sadja katioep angin, lantas sadja kapala sakit dan rasanja seperti menoesoek ka datem hati. Kerna itoe, akoe lantas tidoer dalem itoe lemari-medja, atas adviesnja akoe poenja entiek, jang djoega telah binasa di tangannja itoe doewa pendjahat.

„Itoe lemari-medja di sabelah dalemnja tida memake pintoe, djadi tida engap kaloe akoe tidoer di dalemnja. Kira djam sembilan lebih, lantaran akoe poenja kapala masi teroes sakit akoe tida bisa poeles. Itoe waktoe akoe denger, di lataran ada soewara toekang ronda jang bertreak : „Adoeh !“ Kamoedian dibarengin sama soewara gedeboekan. Akoe rasa boleh djadi orang telah boenoeh pada itoe toekang ronda jang bertjilaka. Berbareng dengen itoe, akoe pikir tentoelah ada perampok jang menjatronin, hingga samingkin akoe tida bisa poeles.

„Blakangan akoe denger bergeraknja djendela jang diboeka dan dari sabelah loewar ada berlompat masoek doewa bajangan hitam. Kamoedian kaliatan doea sinar terang seperti kilat jang digerakin dalem tangannja itoe doea orang. Dan akoe liat iaorang lantas menghoenoes golok dari saroengnja.

Beroelang-oelang akoe denger soewara batjokan-batjokan dan treakannja orang-orang jang diboenoeh, tapi Itoe tjoema terdjadi dalem sedikit waktoe, sebab tida lama kamoedian ka'adahan lantas djadi soenji lagi.

„Di sabelah dalem ada goedang tempat taro barang-barang gadean jang berharga, jaitoe barang perhiasahan emas, perak dan permata. Itoe doewa perampok lantas masoek ka itoe goedang dengen meroesakin selot-selotnja. Kamoedian akoe denger dalem kamar ada kade-

ngeran soewara bergebroekan dan bergombrangan. Boleh djadi barang-barang jang iaorang „benahin“ boekan sedikit djoemblanja. Tapi lantaran sanget katakoetan, akoe tida brani boeka soewara dan tinggal diam dengan tida brani berkoetik. Blakangan iaorang kaloewar lagi dari itoe goedang dan kombali iaorang gerakin itoe barang jang bisa mengaloewarken sinar terang.

„Kita berdoewa soedara,“ kata salah-satoe antaranja pada kawannja, „tida maoe melakoe-ken pakerdjahan dengan gelap. Maka kita berdoewa poenja she dan nama perloe ditoeliskan, soepaja orang bisa taoe siapa jang telah melakoe-ken ini pakerdjahan.“

„Boewat kita berdoewa sama-sekali tida ada halangannja.“ kata itoe kawan jang moekanja koening, „sebab tida mempoenjai tempat kadiaman jang tertentoe. Tapi, dari sebab kita seringkali berdiam di Tjo-tjioe-kio, dalem roemahnja Lou Toako, apabila ini hal dapet didenger oleh politie dan pembesar negri, nistjaja aket menjilakai pada Lou Toako. Kita haroes inget Lou Toako poenja deradjat ada lebih penting dari kita berdoewa, maka djangan sekali kita membikin ia terkena sangkahan djelek. Lagian, pada doewa hari jang berselang, kita poenja omongan jang dioetjapken pada orang dari itoe roemah penggadean boleh dipikirken dengan pandjang oleh marika itoe. Dengan begitoe, kita berdoewa tida bisa dibilang telah melakoe-ken pakerdjahan dengan menggelap. Apabila iaorang ada mempoenjai kapandean, tida ada halangannja menjelidikin pada kita orang.“

„Kaoe poenja omongan ada benar sekali,“ kata orang jang bitjara doeloean dan moekanja

berwarna hitam. „Akoë satoedjoe dan tarik kembali omongankoe jang doeloëan.“

„Sahabisnja iaorang berkata begitoe, lantas pada mengilang di tempat gelap“, begitoeelah Lie Siao Dji menoetoep ianoënja penoetoeran.

„Apa kae taë,“ menanja lagi Pauw Kong, „bahoëwa dalem kae orang poënja roëmah penggadean telah terdjadi perkara apa-apa?“

„Tae,“ djawab Siao Dji.

„Perkara apatah? Tjobalah kae toetoerken dengan terang.“

„Pada tiga atawa empat hari jang berselang,“ kata lagi Lie Siao Dji, „telah dateng doëwa orang jang mae menggade satoe gelang dari batoe giok poetih. Iaorang minta dipegang gade boëwat limapoëloeh tael perak; tapi kita poënja toekang taksir tjoëma mae pegang boëwat harga doëwapoëloeh tael perak sadja. Itoë doëwa orang lantas bitjara kasar jang tida atoëran dan paksa mae djoëga barangnja dipegang gade seperti iaorang telah minta. Lantaran tida mae tjerewet, kita poënja toekang taksir tambah sampe tigapoëloeh tael perak. Tapi ternjata iaorang sanget biadab, sebab lantas memaki kalang-kaboëtan. Kmoedian iaorang menegasken apa kita mae trima atawa tida barangnja digade menoeroet marika poënja permintahan. Kita poënja toekang taksir tetapken bahoëwa kita tida bisa pegang boëwat itoe harga jang terlaloe tinggi.“

„Achirnja iaorang menanja lagi dengan asëran, apa kita brani menjeboët tiga kali tida mae menoeroetken iaorang poënja permintahan. Kita poënja toekang taksir bilang, djangan kata tiga kali, biar poën tigapoëloeh kali djoëga brani. Iaorang lantas mengantjem bahoëwa kita moësti berhati-hati, dalem tiga hari lamanja iaorang mae

dateng menerima kombali modalnja. Kita poenja toekang taksir menanjaken, apa iaorang kenal pada kita poenja madjikan? Iaorang bilang tida kenal, tapi moesti berhati-hati sadja. Sahabisnja mengantjem iaorang lantasi berlaloeh. Tatkala itoe doewa perampok gerakin itoe barang jang bisa mengaloewarken sinar terang, akoe kenalin iaorang poenja roman, jang boekan laen dari romannja itoe doewa orang jang menggadeken itoe gelang batoe giok”.

„Apa kae denger iaorang menjeboetken iaorang poenja she dan nama?” menanja lagi itoe ambtenaar jang mamereksa.

„Tida; sadari bermoela sampe di achirnja iaorang tida menjeboet marika poenja nama”, djawab Lie Siao Dji.

Pauw Kong mendenger omongannja Lie Siao Dji, jang menjeboet romannja itoe doea perampok, satoe itam dan satoe koening, ia djadi inget pada Heng Djoe Liang dan Heng Djoe Houw. Laloeh ia kasi prentah satoe oppas boewat panggil pada itoe doea soedara, berikoet djoega Tie Hoa, jang itoe waktue masi belon poelang. Tida antara lama kamoedian itoe tiga orang soeda dateng dan berdiri di satoe pinggir.

„Lie Siao Dji,” kata Pauw Kong, „apa kae bisa kenalin paras moekanja itoe doewa pendjahat?”

„Soeda tentoe sadja bisa; biar poen satoe tahon lagi, djoega akoe masi bisa kenalin iaorang poenja roepa.”

„Baroesan kae bilang, jang satoe itam dan satoe lagi koening,” kata lagi itoe ambtenaar jang pande, „djika dibandingkan sama kita poenja doewa orang ini, jang djoega satoe koening dan satoe itam, bagimana, sama atawa tida?”

„Itoe doewa pendjahat toeboenja ada banjak lebih pendek dari ini toewan, malah ada banjak lebih koeroes.“

Pauw Kong lantas kasi prentah Ong Tat boleh bawa poelang iapoenja leerling penggawe itoe dan boleh lakoeken teroes pakerdjahannja sabagimana biasa. Sedang itoe mait-mait dari orang-orang jang terboenoeh, boleh dimasoekin dalem peti sabagimana biasanja, tapi djangan dikoeboer doeloe, hanja ditaro satoe di soeatoe tempat jang sepi. Nanti pada sasoedanja ini perkara mendjadi beres, baroelah boleh dikoeboer. Di laen fihak ia kasi prentah pada tikoan dan orang-orang politie boeat pergi menjelidikin itoe doewa perampok. Tan Sioe Djin tikoan lantas berpamitan poelang, sedang Tie Hoa, Heng Djoe Liong dan soedara moedanja poen berlaloeh dari itoe kamar boekoe.

Pauw Kong soeroeh Pauw Hin pergi panggil itoe doewa kapala politie, Han Tjiat dan Touw Soen. Tida antara lama kamoedian itoe doewa orang dateng masoek dan berloetoet hadepannya iapoenja chef. Pauw Kong lantas toetoerken itoe perkara pemboenoehan di dalem roema penggadean Heng Hin, kamoedian prentah iaorang membawa bebrapa poeloech politie berangkat ka Tjo-tjioe-kio, menjelidiki keada'annja itoe orang she Lou jang diseboet itoe doewa begal, begitoe poen itoe doewa-doewa begal sendiri, jang bermoecka item dan koening. Kamoedian iaorang dipasrahken satoe soerat dienst jang soeda dise-diaken, agar bisa minta pertoesoengan pada politie di itoe tempat boewat membantoe menangkep itoe orang-orang djahat bila soeda bisa diketemoeken. Laen dari itoe, Pauw Kong sendiri kasi iaorang ongkos boewat di djalanan, serta di-

djandjiken apabila itoe oeroesan soeda beres aken dikasi lagi persen jang berdjoembla besar.

Han Tjiat dan Touw Soen memdjoera boewat hatoerken trima kasi. Kamoedian iaorang memilih doewabelas pembantoe jang moeda dan koe-wat dengan membekal berbagi-bagi matjem sendjata. Marika itoe semoewanja soeda biasa melakoeken pakerdjahan menangkep maling dan perampok. Sekarang baek kita tjoba tengok pada Lie Beng anaknja Lie Thian Siang, jang doeloan kita tinggaken pada sasoedanja berpisahana sama itoe doewa soedara Heng.

Pada sasoedanja itoe doewa candidaat pemboe-noeh brangkat, Lie Beng senantiasa berkoewatir dan kaget-kaget sadja, lantaran apa samaleman itoe ia sama-sekali ia tida bisa tidoer. Kira pada djam ampat pagi ia soeroe orangnja pergi mendenger kabar di depan kantoer Kay-hong-hoe. Itoe orang soerpehan baroe balik poelang pada waktoe soeda terang tanah dengan membawa kabar bahoewa Pauw Kong masi teroes masoek ka kraton sabagimana biasa.

Lie Beng lantas taoe bahoewa itoe oeroesan telah djadi gagal. Ia soeroe lagi orang boewat menjerepin ka mana perginja itoe doewa candidaat pemboenoeh ; tapi doewa hari kamoedian baroe ia bisa dapet kabar bahoewa Heng Djoe Liong dan Heng Djoe Houw telah menaloek pada Kay-hong-hoe. Satrimanja itoe kabar Lie Beng boeroe-boeroe menoelis pada ajahnja boewat mengasi taoe itoe oeroesan, soerat mana malem-malem djoega ia soeroe orang bawa ka district Siangsoei.

Lie Thian Siang jang mendapat itoe kabar, boekan maen poenja terkedjoet dan katakoetan. Tapi, takoet tinggal takoet, kaloe tida balik ka

kota radja, itoelah tjoema menambahkan sadja iapoenja kadosahan. Maka biar poen ia taoe pasti apabila ia masoek ka kota radja, tentoe Pauw Kong aken mendakwa ia pada baginda keizer dan iapoenja kadoedoekan tentoe bakal gondjet, djabatan boleh hilang, itoe harta jang ia telah dapet koempoel dengan pameresan moesti dilindoengin. Begitoelah ia mentjari bebrapa toekang poopio menganter itoe kalde-kalde jang memoewat oewang ka iapoenja kampoeng kalahiran. Di laen fihak dengan hati kebatkebit ia masoek ka kota radja boewat merapporken iapoenja pakerdjahan. Masi oentoeng, Pauw Kong tida mendakwa padanja, sedang baginda keizer djoega tida mengaloewarken firman jang menjela atawa memoedji iapoenja pakerdjahan, salaennja doewa perkatahan „soeda taoe.”

Lie Thian Siang merasa maloe sendirinja, laloe masoekin request verlot sakit dan blakangan ia masoekin lagi satoe request minta brenti denggen hormat dari pakerdjahan negri boewat tinggal senang dalem iapoenja roemah tangga sendiri. Itoe semoewa permintahan telah diloeloesken oleh baginda keizer.

Sekarang kita balik lagi pada itoe doewa kapal oppas dari Kay-hong-hoe, Han Tjiat dan Touw Soen, jang membawa salosin orang-orang politie denggen menjamar menoedjoe ka Tjo-tjioekio. Sesampnja di itoe tempat, iaorang menginsep dalem satoe roemah makan besar. Ini Tjo-tjioekio terkenal djoega denggen nama Tjo-kio-tien, tempat mana sedari iboe soeri Lie Tayhouw balik kembali ka dalem kraton, atas Pauw Kong poenja pakerdjahan jang berdjasa, Lie Tayhouw lantas kaloewarken oewang negri saratoes riboe tael perak boewat mendirikan lagi satoe

gredja Thian-tjee jang baroe, di mana ada didirikan satoe medja sembahjang itoe iboe soeri sebagai satoe tanda peringatan.

Baginda keizer hendak membri djabatan pada Hwan Tjong Hwa, itoe orang jang merawati pada Lie Tay-houw koetika masi sengsara; tapi dari sebab ia tida ada mempoenjai kamampoean boewat mendjalanken kawadjibannja, laloe soeroe ia pilih sendiri saroeapa pakerdjahan jang ia bisa lakoeken. Itoe orang jang saderhana lantas bilang ia maoe mendapat pakerdjahan kapala kampoeng sampe tiga toeroenan tapi semoewa kapala kampoeng di seloeroe negri moesti berada di bawah iapoenja prentah. Tegesnja ia ingin mendjadi kapala dari semoewa kapala kampoeng.

Baginda Song Djin Tjong lantas anoegrahken ia satoe gelaran Soe Pin Thian Hee To Tee Hong, jang mempoenjai deradajat sama dengan tihoe, begitoe poen iapoenja gadji. Tanah-tanah jang termasuk mendjadi miliknja Thian Tjee Bio berikoet itoe gredja sendiri, semoewanja dioeroes oleh ianja, lantaran apa dengan mendadak iapoenja ka'adahan roemah tangga mendjadi hartawan. Tjoema sajang ia tida mempoenjai anak.

Di itoe tempat ada satoe koelawarga Lou bernama In Pheng, saorang boesoek jang tida mempoenjai pakerdjahan tentoe. Ia ada mempoenjai doewa soedara toewa jang bernama Lou In Pioe dan Lou In Pa, semoewanja mendjabat pakerdjahan militaire tingkatan rendah. Dari sebab iaorang poenja soedara moeda, Lou In Pheng, soeka sekali perkara sama orang, itoe doewa soedara toewa lantaran merasa maloe, lantas pinda ka laen tempat.

Lou In Pheng ada mempoenjai satoe anak le-

laki bernama Lou Khay dan satoe anak prampoewan bernama Lou So Tjin. Doewa-doewanja telah pahamken ilmoe silat jang baek djoega. Oleh kerna Lou In Pheng poenja tjampoeran sangat tjampoer adoek, boleh djadi itoe doewa anaknja poenja ilmoe kapandean mendapat pengadjarannja orang-orang dari golongan lioklim.

Lou So Tjin poenja ilmoe kapandean terlebih lagi bagoes dan mengheranken, jaitoe samatjem ilmoe kapandean jang ditoeroenin oleh iapoenja ma-angkat, dan itoe ma-angkat boekan laen dari istrinja Hwan Thian Poo, Loan Hie Hong.

Dari Sebab Lou In Pheng mengiler sama harta kakajahannja Hwan Tjong Hwa, laloeh ia kasi-ken Lou Khay mendjadi anak-poengoetnja itoe orang hartawan. Blakangan Hwan Tjong Hwa meninggal doenia, Lou Khay kaboengin bapa-poengoetnja sabagimana biasanja satoe anak, dan oleh kerna Hwan Tjong Hwa tida mempoenjai sanak koelawarga jang dekat, djadi tida ada orang jang riboetin iapoenja harta peninggalan. Maka itoe ajah poengoet poenja gelaran djoega lantasi diteroenken pada Lou Khay. Tapi pada sasoedanja habis berkaboeng, dengan perlahan moelai ada orang jang memboedjoeck soepaja Lou Khay pake lagi iapoenja she jang sedjati.

Lou Khay jang bertabeat boeroek, dengan gampang sadja dibikin tergerak hatinja. Ia sama-sekali meloepaken boedi kabaekannja iapoenja bapa poengoet dan lantasi toekar memake lagi she Lou. Dari sebab ia berkoewasa atas itoe Thian Tjee Bio dan tanah-tanah di sakiternja, oewang banjak, penghasilan poen sampe besar. Lantaran pengaroehnja oewang, ambtenaar civiel dan militaire, tida ada satoe jang brani berten-

tangan dengan ianja. Orang-orang ketjil, soeda tentoe sadja, terlebih lagi takoet padanja.

Lantaran merasa dirinja ditakoetin orang, lantas sadja ia mendjadi satoe djagoan jang tida segan melakoeken segala matjem kadjahatan, seperti lepas oewang panas dengan memake renie berat, merampas orang poenja tanah atawa sawah, djoewal beli dengan paksahan dan laen-laen matjem perboewatan jang terkoetoe. Kaloe sadja ada orang jang berbantah sedikit, lantas sadja ia soeroe orang-orangnja kasi labrakan sampe satengah mati. Koetika Lou In Pheng mati, terlebih lagi braninja berboewat segala perboewatan jang kedjam dan boewas, seperti djoega tida ada oendang-oendang negri dan hoekoeman-nja Allah. Lantaran itoe orang kasiken ia satoe gelaran Oa-Giam-Ong, atawa radja noraka jang hidoep.

Sebab kaloe orang bermoesoehan sama ianja, maoe tjeritaken perkara berklai, orang tida bisa menang padanja lantaran ia ada sedia toekang-toekang berklai jang boekan sedikit djoemblanja; maoe bitjaraken bikin perkara pada pembesar negri terlebih lagi tida goenanja. Asal sadja ia mengirim satoe kaertjis nama jang doewa djari lebarnja, sentoe sekali orang jang mendakwa padanja bakal dikerem dalem kamar tahanan satoe boelan lamanja atas iapoenja permintaan jang orang tida brani bantah. Dalem itoe satoe boelan, kaloe doewa minggoe sadja lamanja ia kasi prentah boewat djangan kasi makan pada itoe orang tahanan, boekantah orang itoe bisa mati lantaran kalaparan?

Tjoema ada satoe hal jang boleh dibilang mendingan djoega. Lantaran ia tida soeka sama paras tjantik dan konde litjin, djadi ia tida taoe

mengganggoe orang poenja anak bini. Malah ia sendiri poen tida mempoenjai istri. Sabetoelnja orang jang berpengaruh dan hartawan seperti ianja, dengan gampang sadja ia bisa mendapat satoe istri jang tjantik. Entah apa sebabnja sama-sekali ia tida bernapsoe sama orang prampoewan. Maka dalem roemahnja ia tjoema mempoenjai sadja satoe koelawarga prampoewan, jaitoe iapoenja soedara prampoewan, Lou So Tjin, bersama ia poenja boedak-boedak dan boedjang-boedjang prampoewan.

Sekarang iapoenja ade prampoewan itoe soeda beroemoer doewapoeloeh tahon, tapi sama-sekali belon mempoenjai toendangan, sebab tadinja terlaloe mamilih orang. Koelawarga jang baik dan berderadjat tinggi, tida kasoedian mendapat mantoe jang begitoe matjem, sedang bangsa jang ketjil sabalijnja fihaknja koelawarga Lou jang memandang enteng. Kaloe maoe dibitjaraken paras moekanja Lou So Tjin boleh dibilang sangat elok dan tjantik, tambahan ada mempoenjai ilmoe kapandean silat jang bagoes. Tjoema sajang iapoenja kalakoean tida bresih dan soeda bernoda.

Oleh kerna Lou So Tjin soeda beroemoer doewapoeloeh tahon dan belon djoega besoe-wami, seringkali ia sesalken engkonja, jang tida maoe berkalakoean baik hingga membikin terlantar iapoenja waktoe moeda. Pada saban kali ia bertemoe sama pamoeda jang tjakap, selamanya ia soeka oendjoek iapoenja kalakoean jang genit. Lantaran apa orang lantas kasi ia satoe gelaran jang tida terlaloe manis maksoednja, jaitoe Kioe Bwee Sian Houw alias siloeman rase jang mempoenjai sembilan boentoet.

Pada boelan Shagwee tanggal doewapoeloeh

delapan, soeda dekat pada harian pemboekahan Thian Tjee Bio boewat orang-orang jang maoe sembahjang, dan itoe sembahjangan dilakoeken dari sigwee Tjee-it sampe satoe boelan lamanja. Itoe waktoe lantaran soeda dekat sampe temporna pemboekahan itoe gredja, berdjenis-djenis pedagang jang maoe mentjari kaoentoengan semoewa pada dateng pada pengoeroesnja Lou Khay, boeat menjewa tempat di sakiternja itoe gredja, di mana iaorang boleh taro barang dagangannya. Tapi Lou Khay sama-sekali tida maoe ambil poesing itoe oeroesan, hanja pasrahken sadja dalem tangannya iapoenja pengoeroes jang merangkep pakerdjahan kassier.

Pada itoe hari koetika ia lagi berdoedoek dalem iapoenja kamar batja, mendadak dari loewar ada dateng masoek doewa tetamoe, semoewanja orang dari Lay-tjioe di bilangan Shoatang, jang satoe bernama Kee Sian dan mempoenjai gelaran Kim Kak Lok, dan jang satoe lagi bernama Tio Poo dan tergelar Tiat-thoei-ho. Kou Khay trima kadetengannya itoe doewa tetamoe dengen girang, pada sasoedanja satoe sama laen membri hormat, ia lantas oendang itoe doewa sobat boewat berdoedoek dan soeroe boedjangnja menjediaken thee.

„Kadoewa hiantee bebrapa lama ini apa ada baik?“ menanja toewan roemah.

„Mengandel sama Toako poenja redjeki. kita orang tida koerang satoe apa,“ mendjawab itoe doewa tetamoe dengen berbareng.

„Kadoewa hiantee dateng dari mana?“

„Dari kota radja,“ manerangken Kee Sian.

„Apa dalem kota radja telah dilakoeken „peroesahan“ apa-apa?“

„Ach, Toaku, djangan seboet hal itoe,“ kata

lagi Kee Sian. „Kita orang di kota radja telah menerbitkan kaonaran jang boekan ketjil.“

„Kaoe orang selamanja terlaloe penakoet,“ kata Lou Khay. „Telah terdjadi perkara apa sih, makanja begitoe iboek?“

„Itoe kaonaran jang kita terbitken telah mengambill korban bebrapa djiwa manoesia,“ kata itoe doewa pendjahat dengan berbareng.

„Toako tentoe masi inget akoe poenja satoe gelang batoe giok“, menjamboeng lagi Tio Poo, „barang mana kaloe digadeken di penggadean di sini, selamanja soeka dipegang boeat limapoeloeh tael perak; tapi roemah penggadean di kota radja, roepanja tida niatan bakerdja, koetika kita kakoe-rangan ongkos dan menggadeken itoe gelang, ia-orang tjoema maoe pegang boewat tigapoeloeh tael perak sadja. Lantaran apa kita orang djadi bertjektjok dan bilang dalem tiga hari kita orang maoe ambil poelang modalnja. Oleh kerna kita soeda oetjapken itoe perkatahan, tida bisa tida kita moesti boektiken kita poenja antjeman.

„Pada itoe malem kita orang masoek ka dalem itoe roemah penggadean, jang memake merk Heng Hin, bermoela kita boenoeh doewa toekang ronda, dan koetika soeda masoek ka dalem itoe roemah gade, kombali kita telah boenoeh lima penggawe jang berada di sitoe. Kita beroentoeng bisa gondol sedikit barang permata. Tadinja kita maoe meninggalkan kita poenja nama, tapi lantaran koewatir membikin soesa pada toako, kerna kita seringkali soeka dateng ka sini, maka kita lantas oeroengken itoe niatan“.

Lou Khay lantas tertawa berkakakan.

„Kiranja tjoema perkara sabagitoe sadja,“ kata ia ahirnja. „Biar poen perkara jang lebih besar dari itoe, sedikit poen akoe tida merasa koewatir

atawa takoet." Sahabisnja berkata ia lantas soeroean orangnja menjediaken barang santapan dan minoeman. „Lebih baik kita orang makan minoem dengan senang," menambahkan lagi ia.

„Djangan," kata itoe doewa pendjahat. „Kita tida bernapsoe boewat makan minoem, sebab kita perloe oempatkan diri, soepaja djangan kena tertangkap."

„Kamana kae orang mae pergi, boekantah ada banjak lebih laloewasa tinggal di sini sadja?" menjegah Lou Khay. „Menoeroet akoe poenja pikiran, biar poen ka kae orang poenja roemah djoega, boleh tida oesa poelang. Di sini kae orang toch boleh berdiam dengan senang dan tida oesa koewatir satoe apa."

Lantaran Lou Khay menjegah dengan keras, itoe doewa pendjahat mae apa tida tinggal makan dan minoem di sitoe. Begitoelah itoe tiga orang makan minoem sampe poewas.

Doewa hari kamoedian, sampelah waktoenja pemboekahan sembajang di Thian Tjee Bio. Kee Sian, Tio Poo bersama Lou Khay berdami mae djalan-djalan ka itoe gredja. Iaorang toekaran pakean jang mentereng. Baroe sadja Lou Khay mamesen pada bebrapa belas boedjangnja menjediaken kantong-kantong oewang boewat dibagikan pada bebrapa roemah pendjoedian jang ia boeka, mendadak ada dateng masoek satoe boedjang dengan tersipoe-sipoe dan tersangsanga, hingga dalem sakoetika lamanja ia tida bisa berkata-kata.

„Toa toa toaya, tjitji . . . la . . . ka." kata ia achir-achir. „Dalem bebrapa tahun ini, dalem kita poenja gredja tida taoe dateng orang-orang jang mendjoewal silat; tapi sekarang ada dateng doewa orang dari itoe golongan jang mae mem-

boek a itoe matjem pertoe ndjoekan. Tadi koetika kita orang menanjaken apa iaorang soeda melaporken namanja pada pengeroes dan mendapat idjin. Iaorang bilang tida mengarti. Dan koetika kita orang mintain oewang, boekan sadja ia tida maoe kasi, sabaliknja ia soeda maki-in kita orang”

Baroe sadja mendenger sampe di sini, Lou Khay soeda mendjadi sangat moerka.

„Kaoe orang sama-sekali tida ada goenanja,” kata ia dengan aseran. „Apa kaoe orang tida bisa kasi hadjaran keras pada iaorang?”

„Lantaran kita orang meliat toeboenja itoe orang sangat kasar dan tinggi,” kata itoe boedjang. „kita orang koewatir tida bisa menangken pada marika.”

„Kaoe ini benar goblok sekali ! Apa tida bisa panggil banjakan orang boewat keroeboetin padanja ?”

Baroe sadja Lou Khay bitjara sampe di sini, mendadak ada dateng masoek lima atawa anam orang dengan tergoepoe-goepoe, dalem ka'adahan babak-beloer dan berlepotan darah.

„Toaya, tjilaka besar,” kata bebrapa soewara dengan rameh, „di gredja ada orang jang bikin riboet !”

FATSAL VIII.

Soeda tentoe sadja itoe hal soeda membikin Lou Khay djadi sauningkin goesar, hingga ia rasaken dadanja mæoe meledak.

„Segala tjetjere brani maen gila sama akoe!“ berseroeh ia dengan keras.

Itoe waktoe djoega ia soeroe orangnja panggil koempoel iapoenja toekang-toekang berklai boewat dateng ka itoe gredja, kamoedian ia bertiga dengan membawa bebrapa belas pengikoet menodjoe ka Thian Tjee Bio. Blakangan lantas berkoempoel lagi ampat atawa limapoeloeh goendalnja, dengan laga jang tengal pada mengiringken madjikannja mengikoet ka gredja tersehoet.

Sasampenja ia itoe gredja, ia menanjaken di mana adanja itoe doewa orang jang bikin ri-boet. Orangnja kasi taoe, marika itoe ada di sabelah Barat dari pekarangan itoe gredja. Laloeh ia bersama semoewa pengikoetnja menodjoe ka itoe tempat, tida antara lama kamoedian lantas kadengeran di sabelah depan soewara orang banjak jang berkata: „Nah, toe'pa dianja, soeda dateng!“ Berbareng dengan itoe banjak orang jang pada lari dengan saraboetan. Sebab pada saban kali ini gredja bikin semba-jangan, orang-orang jang dateng bersoedjoet boekan maen banjaknja, ada jang bajar kael, ada jang minta kaselamatan dan redjeki, ada jang mendjoewalan, ada djoega jang tjoema dateng djalan-djalan boewat meliat karamehan sadja. Dalem bebrapa tahun ini segala matjem per-toendjoekan orang bisa liat di sitoe, tjoema per-toendjoekan silat sadja jang tida ada.

Sekarang mendadak ada dateng orang-orang

jang memboeka itoe matjem pertoendjoekan, soeda tentoe sadja banjak sekali orang jang tertarik dan ingin menjaksiken itoe pertoendjoekan jang soeda lama tida ada. Biasanja kaloe orang jang maoe memboeka pertoendjoekan apa sadja, lebih doeloe moesti kasi taoe maksoednja pada orang jang mengoeroes itoe gredja dengan membajar oewang tjoeke. Apabila orangnja Lou Khay merasa senang, seringkali soeka membantoein boewat menambahkan ramehnja itoe pertoendjoekan.

Di antara orang-orang jang mendjoewal silat, oemoemnja djarang jang mempoenjai ilmoe kapandean jang berisi. Sebab orang-orang jang mempoenjai ilmoe kapandean sasoenggoenja, kaloe boekannja bekerdja dengan mendapat gadji tetep dari negri, tentoelah melakoeken pakerdjahan poopio. Kaloe sadja waktue iaorang kapoetoesan ongkos djalan, baroelah mendjoewal silat, djadi boekan pakerdjahan jang tetep, hanja boewat sambilan sadja.

Pada bebrapa tahun jang kerselang, ada banjak toekang-toekang mendjoewal silat kampoengan, jang sama-sekali tida mempoenjai kapandean sedjati, koetika dateng mendjoewal silat ka itoe gredja, lantassadja pada maboer, kerna takoet dimoesoehi oleh orang-orangnja Lou Khay. Iaorang sengadja berboewat begitoe boewat membikin takoet pada jang laen-laen hingga tida brani dateng mendjoewal silat lagi ka itoe gredja, dan di laen fihak hendak oendjoek kosenannja pada pendoedoek di itoe tempat, soepaja orang banjak djadi samingkin takoet padanja.

Tjoema sadja itoe orang-orang jang sekarang mendjoewal silat ka sitoe, sama-sekali boekannja toekang mendjoewal silat, hanja orang-orang jang bakerdja di bawah prentah Gan Sin Bin,

jang satoe bernama Liong Tho dan jang laennja bernama Yauw Beng. Sabagimana pembatja soeda taoe, koetika menaloekin orang-orang di Koensan, iaorang poera-poera menaloek pada Tjiong Taypoo dan koetika orang mametjahken Tong Bong Tin, iaorang diwadjibken melindoengken pada Gan Sin Bin.

Blakangan koetika Tie Hoa mengala gandjarannja pada Sim Tjong Goan dan teroes maboer, Gan Sin Bin moestiken orangnja pergi tjari djoega pada Tie Hoa sampe dapet, sebab dikoewatir pada koetika firman keizer dateng meminta itoe orang tapi orangnja tida ada. Semoewa orang pada berdami boewat mentjari pada Hek-ho-lie, tapi tjoema Tjhio Peng saorang jang tida kalia-tan mata-idoengnja. Maka iaorang pada sasoe-danja berdami dengen mateng, dengen terpentjar pada menoedjoe ka kota radja, saparo boewat mentjari pada Tie Hoa, saparo boewat menje-repin di mana adanja Siang-yang Ong, jang apabila bisa dikatemoeken, tida perdoeli bersama kontjo-kontjonja, semoewa moesti ditangkep dan troes dibawa ka kota radja.

Koetika iaorang maoe berangkat, dari Kay-hong-hoe telah dikirim sadjoembla oewang boeat ia-orang poenja ongkos, pada sasoe-danja menerima ongkos, masing-masing mamilih sendiri kawan boewat sama-sama djalan. Liong Tho lantaran ada tersangkoet familie sama Yauw Beng, maka iaorang berdjalan sama-sama; tapi iaorang boe-kannja maoe mentjari Tie Hoa atawa poen Siang-yang Ong, hanja hendak poelang menengokin roemah, lantaran iaorang koewatir disoeroe mendjabat pakerdjahan di kota radja, djadi tida sempet boewat poelang lagi ka roemah.

Tatkala iaorang sampe di Tjo-kio-tien, moesti

membilok mengambil djalan ka Sin-yan-tjioe, tapi itoe doewa orang jang memangnja kasar dan bodo, tambahan bikin perdjalananan dengan tida memake kantaran, itoe waktoe iaorang merasa tjape dan lelah lantas iaorang brenti mengaso di bawahnja satoe gombolan po-hoen, tapi dengan tida merasa lagi iaorang djadi mengantoeok dan kapoelesan. Koetika iaorang mendoesin, semoewa barang bawa'annja telah digondol orang pada waktoe ia lagi menggeros dengan enak, lantaran apa pada iaorang tjoema katinggalan sadja pakean jang dipake di badan berikoet iapoenja golok jang tergantoeok di masing-masing poenja pinggang, begitoe poen Yauw Beng poenja gombolan tida tertjoeri.

Itoe doea orang lantas saling awasin dengan bingcong dan tida bisa berkata-kata dalem sasa'at lamanja. Kamoedian iaorang saling sesalkan satoe sama laen. Jang satoe bilang mengapa akoe kapoelesan, kae djoega toeroet tidoer; tapi jang laennja bilang, akoe jang tidoer doeloean, kae jang tetoeroetan tidoer. Achirnja iaorang mengoetok pada itoe pentjoeri jang koerang adjar. Tapi apa jang iaorang bisa berboewat? Barang-barang soeda hilang, sekalipoen mengoetok kerak-keroek toch itoe barang-barang tida nanti bisa balik kombali. Dengan apa boleh boewat iaorang moesti trima oentoeng.

Iaorang lantas berbangkit dan pergi menginep di satoe roemah penginepan, tapi lantaran oewang jang tersimpen dalem dompet koelit tida sabrapa, boleh dibbilang iaorang soeda tida mempoenjai bekal lagi boewat meneroesken perdjalanannja. Di hari jang berikoetnja Liong Tho berkata pada kawannja: „Nanti kaloe kita soeda sampe di tapel wates Sin-yang-tjioe, kita bo-

leh tida oesa koewatir kalaparan ; tapi samentara ini, apa boleh boewat kita moesti brangkat pagi-pagi dan kita poenja doeit jang masi katinggalan kita boleh goenaken boewat bajar pemondokan kamoediar, melandjoetken lagi perdjalanann dengan mengiket peroet."

Kabetoelan iaorang djalan meliwati Thian Tjee Bio, di mana ada berkroemoen banjak sekali orang. Mendadak Yauw Beng mendapat satoe pikiran bagoes.

„Soedara Liong," kata ia, „di sini ada satoe tempat baik boewat dapetken oewang, oleh kerna ini waktoe kita lagi kapoetoesan ongkos, mengapatah kita tida maoe mentjari sedikit oewang di sini, agar djangan di sapandjang djalanan kita moesti bikin pindjeman pada orang, begitoe djoe-ga moesti menoenngoe pada sasoesanja kita bisa sampe di bilangan Sin-yang-tjioe, dengan begitoe, boekantah ada banjak lebih baik?"

„Tjari oewang dengan tjara bagimana?" menanja Liong Tho.

„Boekantah kaee ada mempoenjai kapandean ilmoe silat?" balik menanja Yauw Beng. „Orang jang mempoenjai ilmoe kapandean silat, boekantah boleh pertoenndjoeken kapandeanja pada orang banjak boewat mendapetken oewang?"

Itoe omongan soeda membikin tersedar otaknja Liong Tho jang poentoel. Iaorang lantas mengoempoe doewa tiga ratoes tangtjhie, jaitoe sisa katinggalan dari apa jang iaorang poenjaken di itoe waktoe, kamoedian iaorang mamilih satoe tempat di loewarnja itoe gredja jang sabelah Barat. Yauw Beng soeroe Liong Tho menoenngoe di sitoe dan lantas berlaloéh, tida lama kamoedian ia balik kombali dengan membawa satoe papan jang dilapisin tanah poetih. Liong Tho

tida mengarti apa goenanja itoe papan, dan ia lantas tanjakan hal itoe pada kawannja.

„Ini papan akoe baroe beli,“ manerangken Yauw Beng. „Pada sasoedanja kita mempoenjai ini papan, akoe bisa pertoendjoeken akoe poenja kapandezan malempar tempoeling.“

„Ach, kembali kae benar, soedara,“ kata Liong Tho.

Yauw Beng taro itoe papan dan berlaloe lagi, sedikit sa'at kamoedian ia soeda balik kembali dengan berlari-lari, dan di blakangnja ada mengikoeti saorang jang mengoeber sembari moeloetnja tida brentinja berkaok „Aja, aja.“ Liong Tho doega tentoe kawannja soeda menerbitkan kaonaran, dan ia lantas tanjakan hal itoe pada Yauw Beng. Kiranja itoe orang jang mengedjar ada satoe sinshe siang-miah, jang lagi mamegang pit dan tjepoek aer bak boewat meliatin orang poenja peroentoengan Yauw Beng dengan tida kata ba atawa boe, lantas sadja rampas itoe pit dan bak, kamoedian baroe ia bilang mae pindjem doeloe sabentaran, dan lantas sadja ia berlari-lari, maka itoe toekang meliatin lantas mengoeber padanja.

„Tida perloe kae mengoeber,“ kata Yauw Beng. „Nanti pada sasoedanja akoe pake lantas akoe poelangin lagi.“

Tapi itoe sinshe siang-kiah tida ambil perdoeli mengedjar teroes dan berkaok-kaok, jang dari soewaranja bisa dikenalin ada orang kalahiran Selatan.

„Aja, ini orang soeda merampas akoe poenja pit dan bak,“ kata ia.

Lantaran itoe, kabetoelan sekali djadi menarik orang banjak poenja perhatian, hingga boekan sedikit orang-orang jang mengikoeti ka sitoe.

Tapi Yauw Beng tida mengopenin, lantas sadja ia moelai meloekisken gambar sama itoe pit di atas itoe papan jang dilapisan loempoer poetih. Itoe gambar meroepaken satoe orang, dengan mata, idoeng, moeloet dan koeping, malah dibagian peroetnja dibikinken djoega satoe poesernja. Sasoedanja selesih bikin iapoenja loekisan, baroelah ia pasrahken kombali itoe pit dan tjepoek bak pada itoe sinshe khwa-miah, jang lantas berlaloe dengan menggroetoe.

Dengen zonder bikin banjak reclame lagi, itoe waktoe soeda berkroemoem banjak orang jang mengeroeboengin pada iaorang. Yauw Beng dan Liong Tho bereboet maoe kasi pertoendjoekan doeloelan; tapi achirnja Liong Tho jang moelai bikin pemboekahan. Tjoema sadja ia tida biasa oetjapken omongan sabagimana biasanja toekang mendjoewal silat.

„Kita orang ada dari laen tempat”, kata ia dengan serat, „dan loekannja soeda biasa mendjoewal silat. Tjoema dari sebab tida mempoenjai oewang boewat ongkos makan dan mondok, terpaksa kita memboeka ini pertoendjoekan. Tapi kita tjoema mempoenjai sedikit tenaga jang kasar boewat dipertoendjoeken pada toewan-toewan sekalian dan djangan dipandang sabagi pertoendjoekan silat jang biasa, hanja anggep sadja sabagi memberi sedikit pertoeloengan pada kita orang”.

Sahabisnja berkata ia lantas moelai iapoenja ilmoe silat golok jang pada saban tiga kali baltjokan atawa toesoekan dibarengin sama satoe tendangan. Begitoelah sateroesnja, sebab memangnja ia tida mempoenjai lagi laen matjem kamampoean. Pada sasoedanja berselang bebrapa sa'at lamanja, di antara penonton ada jang me-

moedji bahoewa iapoenja ilmoe silat golok sa-soenggoenja bagoes sekali. Maka ia lantas brenti bersilat, ampir dalem sa'at itoe djoega ada bebrapa banjak oewang jang dilemparken ka dalem kalangan. Yauw Beng lantas kasi liat iapoenja ilmoe silat gembolan dalem bebrapa djoeroesan, djoega ada banjak orang jang malemparken oewang.

Yauw Beng lantas berdiriken itoe papan jang ada loekisannja orang-orangan. Bermoela ia timpoeken tempoelngnja pada itoe orang-orangan poenja bagian halis, blakangan ia djoedjoe bagian kadoewa matanja itoe loekisan, dan itoe tiga tempoeling semoewanja mengenakan dengan dji-toe sekali, hingga orang banjak menjamboet dengan tampik-soerak jang rioeh sekali. Kombali orang banjak melemparken oewang ka dalem kalangan. Tatkala Yauw Beng hendak menimpoe-ken lagi iapoenja tempoeling ka djoeroesan itoe gambar orang poenja bagian poeser, mendadak dari sabelah loewar ada mendesak masoek empat atawa lima orang, jang semoewanja memake topi dengan miring dan mendeliken matanja.

„Siapa jang kasi idjin kae orang memboeka pertoendjoekan di sini?“ menanja salah satoe di antaranja dengan laga jang tjongkak.

Ini doewa orang kasar, manatah bisa oetjapken perkatahan manis dan lemboet.

„Apa kae mae perdoeli siapa jang kasi idjin?“ kata marika dengan berbareng.

„Apa kae orang soeda kasi laporan pada pengeroes?“

„Kita tida mengarti apa jang dinamaken laporan pada pengeroes?“

„Apabila kae orang belon kasi lapor, moesti brentiken ini pertoendjoekan.“

Liong Tho dan Yauw Beng meliat dalem sakedjapan mata sadja soeda mendapat begitoe banjak oewang, manatah iaorang bisa kamgoan boewat lantas brentiken iaorang poenja pertoen-djoekan. Achirnja iaorang djadi tjektjok dan teroes berklai. Fihak orang-orang Lou Khay lantaran mengandel pada marika poenja madjikan poenja pengaroeh, memang soeda biasanja soeka berboewat jang tida patoet, apa lagi sekarang ada orang jang brani membantah iaorang poenja kainginan. Tjoema sadja itoe ampas atawa lima boewaja-darat, jang tida mempoenjai kapandean satoe apa, salaennja menang gertak, dalem sedikit tempo sadja soeda kena dilabrak soengsangsoembel dan babak-beloer dengan mengaloewar-ken darah.

„Kaoe orang djangan lari dan toenggoe di sini, kaloe betoel laki-laki,” kata itoe bebrapa goendal djahat jang babak beloer.

„Soeda tentoe sadja kita maoe berdiam teroes di sini,” saot itoe doewa orang. „sebab kita masi perloe sama oewang.”

Itoe bebrapa goendal jang telah mendapat labrakan lantas pada lari boewat mengasi kabar pada madjikannya. Orang-orang jang menonton banjak jang kasi pikiran soepaja itoe doewa orang lekasan menjingkir dari sitoe, sebab itoe orang-orang boekannya boleh diboewat maen-maen.

„Saoepamanja boleh diboewat maen-maen,” kata Yauw Beng, „lebih siang kita soeda menjingkir; tapi djoestroe lantaran tida boleh diboewat maen-maen, kita sengadja maoe maen-maen sama iaorang.”

Liong Tho koempöelken itoe oewang jang berakaran di atas tanah. Berhoeboeng dengan itoe di sabelah loewar kadengeran soewara riboet-

riboet. Penonton jang bernjali ketjil lantasi pada lari menjingkir dengan kalang-kaboet.

„Mana dianja?“ kadengeran satoe soewara menanja di sabelah loewar.

„Masi ada di sabelah dalem; iaorang belon lari,“ saet bebrapa soeara.

Itoe waktoe Lou Khay. Kee Sian dan Tio Poo mendesek masoek lebih doeloe, sasampenja ia berpaling pada semoewa pengikoetnja dan pesen iaorang djangan teeroen tangan doeloe, kamoe-dian ia balik memandang pada Liong Tho dan Yauw Beng.

„Apa kae berdoewa ada toekang mendjoewal silat?“ menanja ia.

„Ja, bener; kae ini inanoesia maoe apa?“ djawab Yauw Beng.

„Kae ini ada saorang jang beroesaha boewat mentjari penghidoepan,“ menjelak Tio Poo, „mengapa katemoe moeka lantasi sadja mengaloewarken omongan jang koerang-adjar?“

„Kae poenja omongan seperti kentoet sadja,“ berseroeh Liong Tho dengan goesar „Siapatah djoega jang beroesaha boewat mentjari penghidoepan? Kae tida sedilikin doeloe siapa adanja kae poenja kadoewa loya ini.“

„Apa? Loya?“ menjentak Tio Poo dengan goesar. „Kae poenja engkoe maoe kasi labrakan padamoe.“

Sahabisnja berkata ia lantasi berlompat menjerang pada Liong Tho. Sabagitoe lekas ia berdiri dengan djedjak lantasi ia menondjok pada itoe orang jang diserang. Liong Tho lantasi samboet itoe kepelan dengan menjengerem, sebab lebih siang Tio Poo soeda tarik poelang iapoenja kepelan. Begitoeolah dalem ampat atawa lima djoeroesan iaorang bertempoer. Tiat-thoei-ho lantasi

menjapoe sama kakinja dari samping, jang tida ampoen lagi mengenakan toeboenja Liong Tho dan teroes roeboeh ka moeka boemi seperti satoe poehoen jang ditebang.

Liong Tho memangnja tida mempoenjai ilmoe kapandean tinggi dan apabila ia menggoenaken sendjata golok, djoega ia moesti toeroen tangan doeloean, nistjaja ia bisa kaloewarken iapoenja ilmoe silat jang membatjok atawa menoesoek tiga kali, lantas dibarengin dengan satoe kali tendangan. Dengan begitoe ia bisa mengangsek seperti satoe kerbo gila dan sedikitnja tentoe ia bisa menang di atas angin. Tapi djika disoeroe bertanding ilmoe silat tangan kosong soeda tentoe sadja tida ada goenanja.

Sabagitoe lekas Liong Tho djato meloso, Yauw Beng lantas mendjadi iboek dan goesar, dengan satoe kali lompat ia menjengkeram pada Tio Poo, orang siapa tentoe sadja tida maoe kasiken dirinja ditjekal orang. Itoe waktoe djoega ia penting kadoewa tangannja sembari berlompat menendang. Dak! mengenakan badannja Yauw Beng, jang lantas djadi sempojongan sedikit.

„Aja, anakkoek, mari tjoba lagi satoe kali!“ berseroeh ia.

Sasoenggoenja djoega, „boek!“ kadengerannja Tio Poo poenja tendangan mengenakan lagi bagian pinggangnja itoe orang jang menantang, tendangan mana membikin Yauw Beng djadi sempojongan lagi doewa atawa tiga kali. Tapi ternjata ia ada sampe bengal dan koewat menahan sakit.

„Hei, anakkoek, tjoba lagi satoe kali,“ kata ia sembari berdjengit.

Sabetoelnja kaloe berboewat apa-apa soeda berhasil, djangan sekali soeka kaenakan dan oe-

langken berkali-kali itoe perboewatan. Tapi Tio Poo pikir lawanannja ada sangat goblok, mae manda ditendangin begitoe roepa, maka dengan zonder berpikir lebih mateng, kombali ia menendang. Sebab ia pikir, taro kata tida mendjadi mampoes, toch sedikitnja moesti roeboeh ka moeka boemi. Tjoema sadja satoe kali ini, Yauw Beng tida berlakoe bodo lagi seperti doeloean, tatkala itoe tendangan ampir sampe, dengan sabelah tangan kanannja ia menondjok sakeras-kerasnja pada itoe pendjahat poenja bagian loetoet.

„Adoeh!” bertreak Tio Poo jang lantas djato tjelentang lantaran loetoetnja kena ditondjok begitoe roepa.

Kim-kak-lok dateng memboeroe dan lantas bertaroeng sama Yauw Beng, dalem doewa atawa tiga djoeroesan, ia lantas goenaken kapalanja menjeroedoek ka djoeroesan dadanja iapoenja lawan, jang lantas tjendorongken toeboe bagian atasnja ka blakang boewat mengegos itoe seroedoekan kapala, berbareng dengan itoe ia menondjok sakeras-kerasnja pada Kee Sian poenja moeka.....

Ini Kee Sian mengapa dikasiken itoe gelaran Kim-kak-lok? Kerna ia bisa goenaken kapalanja menjeroedoek seperti satoe kambing. Kaloe sadja iapoenja kapala mengenakan lawanannja poenja badan, nistjaja lantas djato tjelentang dengan tida bisa menapas. Tjoema sadja sekarang ia katemoeken Yauw Beng, ia katemoeken tandi-ngannja jang keras. Sebab ia itoe sekalipoen boekan ada mempoenjai ilmoe „wedoek” jang tida bisa mempan barang tadjem, tapi iapoenja koelit, daging dan oerat-oerat dari tjiptahannja Allah memang sanget kasar dan koewat

dan iapoenja tenaga soeda tentoe sadja boekanja boleh diboewat maen-maen.

Maka itoe waktoe, sabagitoe lekas iapoenja kepelan mengenakan moekanja Kim-kak-lok, lantas sadja itoe pendjahat djadi berkaok lantaran kasakitan dan teroes roeboeh dengan djoempalitan. Yauw Beng madjoe memboeroe dengan niatan kasi persen lagi satoe tendangan; tapi Kee Sian jang gerakan badannja gesit, dalem itoe waktoe djoega lantas goenaken tipoe Lee-hie-ta-teng, berlompat bangoen dari tempat di mana ia djato. Dan djoestroe di itoe waktoe Lou Khay dateng memboeroe dengan membawa sendjata.

Di laen fihak Tio Poo poen lebih siang soeda berbangkit dan menghoenoes goloknja bertempoer sama Liong Tho. Sabagimana biasanja, Liong Tho tida maoe kasiken laen orang bergerak lebih doeloe, hanja dengan lantas ia kaloewarken iapoenja ilmoe „tiga kali batjokan golok dibarengin sama satoe kali tendangan,“ lantaran apa soeda membikin Tio Poo terserang dengan ripoeh dan gelagapan, hingga ia rasaken kapalanja djadi poesing.

Kee Sian jang soeda bisa bernapas poen, lantas menjaboet iapoenja golok dan menjerang pada Yauw Beng, orang siapa lantas kaloewarken iapoenja gembolan besi jang sabesar pinggang. Itoe waktoe Kee Sian poenja golok membatjok ka djoeroesan atasan kapalanja. Ia menoenggoe sampe itoe golok soeda dateng dekat, baroelah ia mengangkat gembolannja boeat menangkis. „Trang!“ kadengerannja itoe golok jang beradoe sama itoe gembolan. Kee Sian rasaken iapoenja telapakan tangan jang mamegang golok seperti maoe terbeset. Ia lantas lemparken goloknja dan balikin badanja teroes maboer.

Tio Poo lama-lama taoe djoega jang Liong Tho poenja ilmoe silat golok tjoema sabagitoe sadja, koetika ia meliat Kee Sian kena dikalaken oleh Yauw Beng, ia lantas tida mengopenin pada lawanannja sendiri, hanja lantas sadja menoesoek dengan goloknja ka djoeroesan Yauw Beng poenja blakang; tapi orang jang diserang poen soeda dapet taoe hal itoe, dengan tjepat ia balikin baddannja sembari menjampok sama iapoenja gembelan. Goloknja Tio Poo jang kena tersampok, djoega tida bisa dipegang kekal dalem tangannja dan teroes djato ka moeka boemi.

Beroentoeng ada dateng Lou Khay jang menjelak. Ia menjerang dengan goloknja pada Yauw Beng jang maoe mengedjar Kee Sian, tapi koetika iapoenja golok ditangkis oleh moesoehnja, dengan tjepat ia tarik poelang dan begitoelah sateroesnja ia tida kasiken goloknja djadi beradoe sama sendjatanja iapoenja moesoeh, Baroe sadja berdjalan ampat atawa lima djoeroesan, di sabelah sana kadengeran Liong Tho djato tjelentang lantaran kena diseroedoek oleh Kee Sian. Hal mana soeda membikin Yauw Beng djadi terkedjoet dan bengong sakoetika lamanja. Sama-sekali ia tida njana djoestroe pada itoe waktoe Tio Poo menendang dari blakang ka iapoenja tekoekan loetoet. Soeda tentoe sadja kakinja djadi lemas dan teroes djato kasoempat.

Djoestroe pada waktoe Lou Khay maoe membatjok pada blakangnja, mendadak ada kadengeran saorang berseroeh dengan lagoe bitjara Selatan.

„Hola, kae binatang-binatang,“ kata itoe orang jang berlompat menghamperi, „apa brani melakoeken pemboenoehan di tempat terboeka dan di waktoe siang?“

Berbareng dengan itoe ia lantas menjerang pada Lou Khay dengan tida banjak bitjara lagi. Itoe orang boekan laen dari Seng-tjhioe-sioe-soe, Pang Jan. Ia berdjalan bersama-sama Ngai Houw dan Lou Tien bertiga. Di sapanjang djalan iaorang mentjari taoe di mana adanja Tie Hoa dan Siang-yang-Ong.

Di tengah perdjalanan, Ngai Houw bilang ia maoe pergi tjari satoe orang, lebih baek berpisahan sadja dan bertemoe kombali di kota radja. Ini semoewa tersebut Ngai Houw tida bisa akoer sama Pang Jan. Maka ia maoe menjimpang ka Yang-tjioe boewat tengok iapoenja goeroe.

Louw Tien jang djalan berdoewa sama Pang Jan, itoe hari sampe di Tjio-kio-tin boewat brenti mengaso dan makan. Itoe toekang roemah makan jang soeka banjak mengomong berkata pada iaorang : „Mengapa toewan-toewan tida maoe pergi liat karamean ?”

„Liat karamean apa ?” menanja Pang Jan.

„Di sini ada satoe gredja jang diseboet Thian Tjee Bio”, djawab itoe toekang roemah makan. „Doeloean, Pauw Kong dari Kay-hong-hoe telah ketemoeken iboe soeri Lie Tayhouw di ini tempat, dan blakangan pada sasoedanja iboe soeri balik poelang ka dalem astana, lantas soeroe bikin baroe itoe Thian Tjee Bio, hingga sekarang itoe gredja ada rameh sekali sama orang-orang jang dateng bersoedjoet. Akoe rasa toewan berdoewa baek sekali pergi nonton doeloe ka itoe gredja, kamoedian baroe berangkat lagi”.

Apabila meneroet pikirannja Louw Tien, tida maoe pergi nonton.

„Kita orang perloe boeroe-boeroe berangkat ka kota radja,” kata ia. „Apatah perloenja pergi menonton segala karamean jang begitoean ?”

Pang Jan terpaksa moesti manggoetken kapalanja boewat menjataken iapoenja satoedjoe. Pada sasoedanja iaorang makan, Pang Jan lantas pergi ka loewarnja itoe roemah makan, ia liat ada bererot-erot goendoekan orang jang pada menoe djoe ka djoeroesan Barat, deng-n tida merasa lagi ia poen toeroet mengikoetin pada itoe rerotan orang banjak. Tida lama kamoedian itoe gredja soeda kaliatan, tapi ia liat banjak orang jang pada lari sana-sini dengan seraboetan. Dengan rioeh kadengeran orang banjak bertreak: „Riboet! Roesoeh! Perklaian sengit!”

Pang Jan lantas datang memboeroe dan mendesak di antara orang banjak, iapoenja kadateangan djoestroe kabetoelan sekali, sebab itoe waktoe Lou Khay djoestroe hendak memboenoeh pada Yauw Beng, di laen fihak ia liat Liong Tho poen soeda kena diringkoes orang. Hal mana membikin Pang Jan djadi kaget, sembari menjaboet golok sembari memaki ia menerdjang pada Lou Khay. Pada waktoe ia berdoewa bertempoer, Yauw Beng poen di'iket oleh orang-orangnja Oa-Giam-Ong. Kee Sian poengoet goloknja Liong Tho, dan Tio Poo poengoet ia sendiri poenja golok jang lebih doeloe terlepas dari tangarnja, semoewanja datang mengeroeboetin pada Pang Jan.

Pang Jan jang dikeroeboetin bikin perlawanan sembari memaki, tapi sedikit poen ia tida merasa takoet pada itoe tiga pendjahat, sabalijnja itoe tiga pendjahat poen tida pandang mata pada Pang Jan. Sembari bertaroeng Lou Khay menanja pada Pang Jan, bahoewa sama-sekali iapoenja kontjo-kontjo ada brapa banjak, soepaja gampang ditangkep semoewanja boewat pasrahken pada pembesar di ini tempat. Tapi Pang Jan tida

maoe ambil perdoeli orang poenja pertanjahan. Begitoelah iaorang bertempoer bebrapa lamanja dengan berimbang masing-masing poerja kakoe-watan. Mendadak dari djoeroesan Selatan ada dateng lagi saorang laen, jang dengan soewara lemah-lemboet menanjaken apa sebabnja iaorang bertaroeng.

„Apatah sebabnja maka kae orang bertaroeng begini sengit?“ menanja orang itoe „Sabetoelnja lantaran oeroesan apa sih? Tjobalah kae orang tjeritaken padakoe, kamoedian masi ada banjak tempo boewat melandjoetken lagi ini pertempoeran.“

„Aja, Toako, mengapa mae mengopenin pada iaorang?“ berseroeh Pang Jan. „Kita poenja orang semoewanja kena ditangkap dan di'iket oleh marika. Toch, di sana, tjoba liat sendiri sadja.“

Orang itoe boekan laen dari Louw Tien, jang koetika mentjari pada Pang Jan tida kaliatan mata-idoengnja, ia lantas tanjaken pada toekang roemah makan, baroelah ia taoe, bahoewa kwanja soeda pergi djalan-djalan ka gredja Thian Tjee. Ia merasa koewatir sekali, jang Pang Jan aken menerbitken kaonaran apa-apa. Maka ia lantas dateng menjoesoel ka sini. Sasampenja ia denger rameh orang bitjara bahoewa soeda terdjadi perkara pemboenoehan. Ia pikir siang hari bagaimana ada orang brani melakoeken pemboenoehan di ini gredja. Lantaran ia sangka Pang Jan jang menerbitken katjilakahan apa-apa, ia lantas memboeroe ka itoe tempat bertaroeng, dan liat Pang Jan lagi dikroeboetin oleh itoe tiga orang.

Blakangan koetika Pang Jan oendjoekin padanja bahoewa Liong Tho dan Yauw Beng telah

kena tertangkap dan di-iket, terpaksa ia poen lantas menghoenoes goloknja dan madjoe menerdjang boewat membantoei kawannja. Satoe kali Louw Tien toeroet toeroen tangan, kadoewa fihak poenia ilmoe kapandean lantas ternjata terpaonet djaoeh sekali. Dalem sakedjapan mata sadja, ia soeda kasi labrakan itoe tiga pendjahat djadi gelagapan dan terdesak dengan ripoeh.

Hal mana membikin iboek pikirannja Lou Khay, djoestroe pada waktoe ia hendak kasi prentah orang-orangnja madjoe mengeroeboetin boeat perang sabil, mendadak di sebelah Selatan ada kadengeran soeara riboet-riboet : „Nona soeda dateng !“ dan itoe kawan goendal pada menjingkir ka pinggir boeat mengasi satoe djalan. Ampir dalem sa'at itoe djoega dari sabelah loear ada dateng masoek satoe gadis jang parasnja sanget eilok tapi tingkanja genit.

Pembatja tentoe soeda mendoega bahoewa ini gadis ada Lou So Tjin, soedara prempoeannja Lou Khay. Itoe waktoe ia berpakean badjoe dan tjelana jang serba ringkes dan tida memake koen. Tjoema di loearnja ia ada memake satoe djoeba pandjang. Sebab ia mendapet kabar dari boedjang-boedjang bahoewa di gredja soeda terdjadi satoe perklaian heibat, antara iapoenja orang-orang dengan bebrapa toekang mendjoewal silat. Koetika ia sampe, djoestroe pada waktoe engkonja dan iapoenja doea kawan lagi kena didesek keras oleh satoe pemoeda tjakap, maka ia lantas melepasken iapoenja djoeba dan berkata :

„Engko-engko sekalian, harep soeka menjingkir, biarken akoe jang menangkep pada ini manoesia-manoesia koerang-adjar.“

Louw Tien lantaran meliat orang jang dateng ada satoe prampoewan, ia tida mae madjoe

menjerang ; tapi Pang Jan sama-sekali tida maoe ambil perdoeli itoe, hanja lantas sadja madjoe menjerang sama iapoenja golok. Lou So Tjin tida menangkis orang poenja batjokan itoe, hanja moendoer satoe tindak ka blakang boewat mengegos itoe batjokan, kamoedian ia mengangkat sabelah kakinja menendang ka djoeroesan tanganja Pang Jan jang mamegang golok dan itoe tendangan telah mengenakan dengan telek, hingga Pang Jan lantas berseroeh lantaran kasakitan serta melepaskan itoe golok jang ia pegang. Ampir dalem sa'at itoe djoega Lou So Tjin bongkokin sedikit badannja dan menjapoe sama sabelah kakinja. Pang Jan jang masi rasaken sakitnja iapoenja tangan, tida sempet berkelit, maka dalem itoe waktoe djoega ia lantas djato roeboeh sabagi satoe gedebong jang ditebang. Lou So Tjin lantas madjoe menerdjang pada Louw Tien.

FATSAL IX.

Kioe-bwee-sian-ho dari satadian soeda memperhatikan romannja Louw Tien jang sanget tjakap, hingga iapoenja hati merasa tertarik. Samentara Louw Tien jang meliat Pang Jan kena diroeboehken dan teroes tertangkap, soeda tentoe sadja ia djadi sangat goesar ; sekarang ia soeda tida maoe ambil perdoeli lagi apa itoe moesoeh ada satoe prampoewan atawa boekan, hanja lantas sadja madjoe menjerang dengan mengaloewarken iapoenja sa'antero ilmoe kapandean. Ia bernapsoe sekali dengan satoe kali tabas sadja bikin poetoes kapalanja itoe prampoewan genit kamoedian dengan tida soesa ia bisa beresin jang laen-laennja.

Tapi, ia poen taoe bahoewa ini prampoewan poenja ilmoe silat ada sampe tinggi, sebab kaloe boekannja begitoe, tentoelah Pang Jan tida nanti bisa dikalahken dengan begitoe gampang. Maka ia poeter goloknja dengan katjepetan seperti angin dan kilat. Ia bersilat dalem ilmoe silat jang dinamaken Ban-sin-too. Iapoenja golok sabentar menjamber ka atas, sabentar ka bawah, kamoe-dian ka kiri dan ka kanan, tjepatnja malebihken dari titiran, hal mana soeda membikin Lou So Tjin djadi sangat ripoeh dan sama-sekali tida mendapat koetika boewat membales menjerang. Masi oentoeng iapoenja gerakan badan sampe sebat dar bisa mengegos kiri-kanan dengan tjepat; tapi biar poen begitoe, ia taoe lama-lama tentoe ia bakal tjilaka.

Ia pikir tjilaka betoel, kaloe ini hari moesti kena dikalahken oleh ini orang. Malah iapoenja engko poenja nama jang soeda begitoe termasuk hoer, dalem sakedjapan tentoe aken djadi ternoda. Lantaran hatinja bingoeng dan takoet, matanja djadi koerang awas, sedeng iapoenja gerakan badan dan kaki tangan djoega tida begitoe laloewasa lagi seperti doeloean.

Louw Tien meliat itoe keadahan, dalem hatinja merasa sanget girang dan taoe jang ia tentoe bakal bisa kalahken itoe prampoewan. Lou So Tjin jang soeda berniat berlompat kaloewar dari kalangan bertanding, laloeh poera-poera membatjok pada moesoehnja, tapi Louw Tien tida kena diakalin, boekannja ia berkelit, sabaliknja ia menendang ka djoeroesan tangannja itoe prampoewan jang membatjok.

„Adoeh!“ berseroeh Kioebwee-sian-ho lantaran kasakitan; „Kontrang!“ soewaranja iapoenja golok jang terlempar ka moeka boemi. Louw

Tien barengin ini koetika jang baek lantas angkat goloknja menoesoek ka djoeroesan blakangnja Lou So Tjin, sebab itoe prampoewan djoestroe soeda belikin badannja boewat maboer. Apabila Lauw Tien teroesken iapoenja toesoekan dengan keras, tida ampoen lagi tentoe itoe golok terpendem dalem badannja itoe prampoewan genit; tapi ia lantaran merasa tida tega dan tida maoe membinasakan djiwa manoesia, ia djadi berlakoe ajal sedikit. Inilah jang dikataken manoesia tida berniat meloekai pada sang matjan, tapi sabaliknja sang matjan sengadja maoe menjilakai pada manoesia,

Lou So Tjin lantaran kaget dan katakoetan, iapoenja moeka jang dipoepoerin dengan tebel berobah mendjadi koening seperti salemba kertas. Ia taoe goloknja Louw Tien jang berada di blakangnja, biar poen maoe berkelit djoega tida nanti bisa dikasi liwat; tapi soeda tentoe sadja ia moesti berdaja sabisa-bisanja boewat singkirken itoe toesoekan jang sanget berbahaja. Tjoema sadja dalem sa'at itoe djoega ia mendapat kanjataan jang Louw Tien soeda perlahan-lahan gerakan tangan jang menoesoek, sabagi djoega merasa tida tega menoesoek padanja. Dalem tempo jang begitoe pendek, ia bisa pikir bahoewa Louw Tien ada saorang jang berboedi dan baek hati. Ia merasa sanget bersoekoer atas boedi kabaekannja itoe anak moeda jang tjakap.

Itoe semoewa hal terdjadi dalem tempo jang sangat pendek. Pada waktoe Louw Tien bersangsi dan Lou So Tjin berpikir, terdjadi dalem sedikit sa'at sadja. Tapi itoe prampoewan bengal tida tinggal diam, sembari berpikir tangannja mengambil saroepa barang jang berwarna merah

dari badannja, jang kamoedian ia keboetken ka djoeroesan moekanja Louw Tien, orang siapa dalem sa'at itoe djoega kapalanja djadi poesing dan mata gelap, kamoedian ia djato kasoempet dengen tida inget orang.

„Manoesia koerang-adjar, brapa banjak sih kae poenja kapandean!” berseroeh Lou So Tjin jang sekarang bisa berlakoe katak lagi. Ia berpaling pada engkonja dan berkata lagi: „Engko engko sekalian boleh soeroe orang ringkoes padanja, tapi djangan binasaken iapoenja djiwa.”

„Baeklah,” djawab Lou Khay.

Kamoedian ia kasi prentah pada orang-orangnja boewat iket pada Louw Tien dan bersama tiga orang jang laennja dibawa ka roemahnja. Orang-orang jang menjaksiken itoe karamehan atawa poen kariboetan, semoewa pada boebaran. Banjak di antaranja jang berhati baek merasa sangat koewatir bagi kaselamatannja itoe ampat orang jang terdjato di dalem tangannja itoe orang-orang djahat. Lou So Tjin lantas poengoet kembali iapoenja golok dan pake lagi iapoenja djoeba, lantas poelang doeloean ka roemahnja.

Lou Khay bersama Lee Sian dan Tio Poo dengen di-iringken oleh kambrat-kambratnja mengiringken itoe ampat orang tawanan menoedjoe ka iapoenja roemah. Sasampenja ia soeroe taro itoe ampat orang tawanan di moeloet pintoenja iapoenja kamar-boekoe. Koetika iaorang soeda berdoedoek di dalem itoe kamar, Tio Po lantas menanja: „Toako, itoe bebrapa orang tawanan mae dibagimanain?”

„Boenoeh sadja pada marika itoe,” kata Lou Khay dengen tida berpikir pandjang.

„Djangan.” menjega Kee Sian. Akoe liat itoe ampat orang boekannja bangsa sembarangan-

Akoe rasa ada lebih baik tanjakan doeloe ia. orang poenja asal oesoel, kamoedian masi ada banjak tempo bewart memboenoh pada iaorang. Lagian, tadi akoe denger ada So Tjin bilang djangan boenoh pada itoe anak moeda. Salaenja itoe, akoe liat marika itoe boekannya seperti orang sini, malah salah satoe di antaranja iapoenja lagoe bitjara seperti orang dari Selatan, jang kaloe boekannya kawan Liok-lim tentoelah Eng-djiauw (perkataan resia bangsa pendjahat jang berarti ambtenaar atawa politie). Maka akoe rasa paling betoel kita moesti tanjakan doeloe iaorang poenja hal-ichwal."

"Kaloe soedara bilang begitoe, baiklah," kata Lou Khay jang tida mempoenjai pikiran tetap.

Tapi baroe sadja ia maoe soeroean orang-orangnja pergi bawa itoe ampat orang boewat ditanjakan katerangan, mendadak ada dateng masoek satoe boedjang jang mengasi taoe ba-hoewa di loewar ada Tjoei Tay-ya dateng mengoendjoengin, dan tida antara lama lantas berdjalan masoek satoe orang, jang mendjadi kita poenja kenalan lama. Orang itoe boekan laen dari Tjoei Liong jang mendapat gelaran Pinti-at-ta, itoe eigenaar roemah makan Kie-tjhoenwan dan blakangan kena dioeber-oeber oleh Ngai Houw; blakangan lagi ia dateng ka Kou-tjioetiam, jang letaknja di Kou-tjioekang, di mana ada satoe soedara moedanja, Tjoei Pa, memboeka satoe roemah makan jang memake merk Hiong-tiam, dan di sini poen ia tida bisa tinggal senang sebab soeda dioebrak-abrik oleh San-seegan, Tjie Liang dan Ngai Houw.

Koetika di dalem gredjanja Nio Too Hin, kombali ia terkena oleh Tjie Liang poenja sendjata resia, sahingga ia djadi terpentjar sama

iapoenja soedara moeda. Ia sendiri pergi menaloek pada Siang-yang Ong dan pada sasoedanja Siang-yang Ong kena dilabrak oleh orang-orangnja Gan Sin Bin, ia bertemoe sama Hong-bianlong, Tjoe Eng, orang siapa kasi taoe tentang keadahannja itoe radja moeda dan soeroe ia pergi djandjiken orang-orang boewat membantoe lagi pada Siang-yang Ong boeat terbitken pembrontakan. Maka sekarang ia dateng ka sini, perloenja boewat djandjiken Lou Khay menaloek pada itoe radja moeda dan bantoe bikin pembrontakan.

Itoe tiga orang lantas menjamboet kadatenganja itoe tetamoe, pada sasoedanja Tjoei Liong dan Lou Khay saling djalanken kahormatan, orang jang terseboet blakangan kasi adjar kenal tetamoenja pada Kee Sian dan Tio Poo. Koetika Tjoei Liong mae masoek ka dalem itoe kamar boekoe, ia soeda liat itoe bebrapa orang tawanan jang kaki tangannja terikat, tapi dalem sawaktoe itoe ia belon bisa kenali siapa adanja marika itoe. Tapi Pang Jan lantas sadja bisa kenalin pada Tjoe Liong, hal mana soeda membikin ia mendjadi girang. Ada ini orang dateng, kita boleh tida oesa merasa takoet. Itoe waktoe Louw Tien poen soeda djadi sedar dari pangsannja. Kombali ia mengaloewarken satoe treakan dan teroes melekin kadoewa matanja.

„Prempocan koerang-adjar!“ kata Louw Tien. Koetika memboeka kadoea matanja ia mendapat kenjataan dirinja dan laen-laen kawannja, semoea di-iket seperti samseng.

Sekarang pada waktoe iaorang tida ada di sini,“ berbisik Pang Jan, „akoe mae kasi taoe kae soeatoe hal. Sabentar djika iaorang dateng, kita moesti mengakoeh bahoewa kita semoea ada

orang-orang dari Ong-hoe dan akoe maoe bitjara dengan bahasa resia sama iaorang. Djika marika menanjaken pada kae orang, boleh bilang sadja jang kae orang masi belon peladjarken itoe bahasa resia. Kae bernama Tjin Louw, sedeng kae, Liong Tho, bernama Licng Beng, dan kae, Yauw Beng, bernama Yauw Tho. Soedara Tjin akoe jang bawa dateng ka Ong-hoe, sedeng kae berdoea belon lama masoek bakerdja pada Ong-ya. Ingetlah baik-baik, djika kita bisa berboeat dengan bagoes, nistjaja kita orang poenja djiwa bisa katoeloengan."

Semoea orang manggoetken kapala menandakan jang iaorang setoedjoe. Itoe doea orang kasar soeda tentoe sadja soeka menoeroet, sedeng Louw Tien dalem samentara ini tida bisa pikir daja jang lebih baik, maoe apa tida ia moesti menoeroetin Pang Jan poenja akal.

Itoe waktoe di sebelah dalem kadengeran orang lagi pada bitjara.

"Lou Toako akoe sengadja dateng ka sini boewat bitjara sama kae," kata soewaranja Tjoei Liong.

"Ada perkara apa," menanja Lou Khay.

"Ini waktoe Siangyang-Ong Lou Toako akoe poenja omongan ini ada melanggar larangan negri; akoe harep soepaja kae soeroe kae poenja orang-orang berlaloe dari sini."

"Ako poenja orang-orang semoewanja boleh dipertjaja," kata Lou Khay, "djika ada omongan apa-apa, boleh diomongken sadja dengan tida oesa koewatir."

"Tadi koetika akoe lagi maoe masoek, akoe liat di sana ada bebrapa orang jang diringkoes kaki-tangannja. Apa sebabnja iaorang diperlakoe-ken begitoe?"

Baroe sadja Lou Khay maoe mendjawab, mendadak kadengeran di sabelah loewar ada soewara orang berseroeh.

„Aja, Tjoei Toako,“ kata soewaranja Pang Jan, „roepanja kae soeda tida maoe kenalin lagi pada sobat-sobat. Itoelah terlaloe angkoeh dan tida bagoes!“

„Siapatah itoe orang jang bitjara?“ menanja Tjoei Liong, jang masi belon bisa kenalin pada itoe orang jang bitjara.

„Banjakan ada orang jang kenal pada Toako,“ kata Lou Khay. „Tjoba lekasan pergi kaloewar tengok.“

Tjoei Liong lantas kaloewar dan liat, dalem sa'at itoe djoega ia kenalin Pang Jan, orang sia-pa lantas berkata: „Tjoei tay-ya, apa masi bisa kenalin akoe jang hina-dina ini?“

„Ai, kiranja Pang-ya,“ bersereeh Tjoei Liong. „Lou Toako, mengapa soeda ringkoes padanja? Ini boekan orang loewar, hanja sala satoe dari sobat-sobat jang berkoempoelan di Ong-hoe poenja Tjip-hian-tong. Ia soeda berboewat kasalahan apa pada Toako, makanja diringkoes?“

Lou Khay jang mengikoeti kaloewar lantas kasi katerangan apa jang soeda terdjadi.

„Kaloe begitoe tida ada kasalahan apa-apa jang terlaloe besar,“ kata Tjoei Liong.

„Tida,“ kata Lou Khay.

„Kaloe begitoe, akoe harep sadja Toako soeka memandang akoe poenja moeka malepaskan pada iaorang.“

Lou Khay manggoetken kapala dan prentah orang-orangnja boewat memboekaken itoe ampat orang poenja tali ringkoesan. Itoe ampat orang lantas berbangkit dan keboet-keboet masing-masing poenja pakean. Pang Jan lantas mengham-

peri pada Tjoei Liong boewat membri hormat dan menanjaken iapoenja kawarasan.

„Tjoei Toako poenja sobat ini,” kata ia, „akoe rasa ada sobat dari golongan „hap-djoe” barangkali?”

„Boekan,” djawab Tjoei Liong.

Lou Khay mendenger itoe omongan, lantas mendoega bahoewa iaorang ada dari golongan perampok atawa jang biasa diseboet liok-lim, makanja bisa bitjara dalem itoe bahasa bangsat. Tjoei Liong lantas adjar Pang Jan berkenalan sama Lou Khay.

„Ini Seng-tjhioe-sioe-soe, Pang Jan; Pang-ya, ini ada Lou Khay Toako, jang tergelar Oa-Giam-Ong,” begitoelah Tjoei Liong berkata boewat adjar itoe doewa orang berkenalan satoe sama laen. Kamoedian ia minta Pang Jan adjar kenal ia itoe poenja tiga sobat jang laennja. Dan begitoelah Pang Jan poen lantas adjar kenal ia poenja tiga kawan itoe, pada Lou Khay dan Tjoei Liong. Di laen fihak Lou Khay panggil Kee Sian dan Tio Poo boewat berkenalan pada marika itoe. Pada sasoedanja beres, laloe pada mengambil tempat doedoek dan minoem thee.

„Pang-heng,” kata Tjoei Liong, „apa kae taoe perkaranja Ong-ya?”

„Akoe bersama laen-laen kawan dan Ong-ya poenja Ong-koan bertempoer sama Pak-hiap, Lam-hiap dan laen-laen,” kata Pang Jan, „tapi tida njana kita poenja fihak kena dikalahken dan Ong-ya melariken diri, entah ka mana. Sebab kita tjari sana-sini tida bisa dikatemoeken. Sampe sekarang kita orang poen djoestroe men-tjari teroes pada Ong-ya, tapi masi belon djoega beroentoeng bisa dikatemoeken. Baroesan kita orang kabetoelan liwat di Thian Tjee Bio, lantas

djadi setori dan berklai sama orang-orangnja Lou Toako. Beroentoeng Tjoei Toako kaboeroe dateng, kaloe tida, tentoe sekali kita tida brani bitjara dengan teroes-terang." Taro kata Lou Toaya menanjaken pada kita orang, pasti sekali kita tida lanti brani bitjara dengan sabetoelnja. Maka Tjoei Toako poenja kadatengan, itoelah ada kita orang poenja peroentoengan bagoes."

"Kaloe kaee orang tida taoe di mana adanja Ong-ya," kata lagi Tjoei Liong. „akoe sabalikhnja taoe. Sebab koetika akoe pergi ka Tek-an-bee, bertemoe sama Tjoe Eng"

„Apa boekannja jang tergelar Hong-bian-long ?” memotong Pang Jan.

„Ja, benar ianja. Ong-ya koetika meliat iapoenja oeroesan roesak, lantas bawa iapoenja poetra-poetra bersama Loei Eng dan laen-laen, melolos kaloewar dengan mengambil djalan dari kolong lemari, jang ditaro di satoe roewangan jang dinamaken Eng-tong, di mana ada satoe djalanan dalem tanah, jang meneroes ka satoe tempat, ampat lie djaoenja dari loewar kota. Namanja itoe tempat Heng-hoa-tiam, di mana Ong-ya ada mempoenjai satoe taman boengah, sedang itoe djalanan dalem tanah menemboes sampe di satoe pertengahan dalem taman terse-boet. Di sitoe telah disediakan bebrapa kreta dan koeda-koeda, laorang goenaken itoe kandan-kandaran menoe djoe ka negri Leng-hee.

„Radja dari itoe negri Leng-hee maoe pasrahken iapoenja tacht karadjahan pada Ong-ya, tapi Ong-ya menoe lak. Itoe radja Leng-hee lantaran menginget doeloean, koetika Tio Kong Bie Lo-Ong-ya bawa pasoe kan balatentara melabrak negri Leng-hee dan soeda sampe di depan pin-toe kotanja itoe negri. Radja itoe negri jang ber-

tachta di itoe waktoe lantas masoekin satoe request menaloek. Djika menoeroet pikirannja laen-laen peggawe perang, tiada maoe meladenin orang poenja permintahan bertaloek, hanja maoe melabrak teroes bikin petjah itoe kota dan basmi semoewa pendoedoeknja sampe bresih. Tapi Lo-Ong-ya tida satoedjoe, sabaliknja ia trima dengan baek peraloekannja radja Leng-hee dan kasi tinggal itoe karadjahan boewat berdiri teroes.

„Tatkala Lo-Ong-ya balik poelang ka Kraton, Tio Pou, itoe bangsat toewa, lantas bikin tjelahan, katanja soeda satoe kali salah tida boleh dibikin salah boewat kadoewa kalinja. Lo-Ong-ya sanget djengkel mendenger itoe tjelahan dan ia lantas gantoeng diri sampe mati dalem iapoenja astana. Radja Leng-hee mendenger itoe kabar, lantas brentiken iapoenja oepeti jang saban taon biasanja ia kirim ka Tiongkok, di laen fihak ia mengatoer dan mendidik satoe pasoeakan balatentara besar, boewat bikin pembalesan atas Lo-Ong-ya poenja sakit hati. Koetika Siang-yang-Ong mengatoer dan mendidik pasoeakan balatentara di Siangyang, itoe radja poen ada menoelis soerat, katanja apabila kamoedian Ong-ya maoe gerakin balatentara, boleh kasi kabar padanja, ia maoe membantoe sabagi barisan jang madjoe paling moeka.

„Sekarang lantaran Ong-ya tida maoe trima iapoenja tachta karadjahan, ia maoe membri bantoean sama iapoenja pasoeakan balatentara boewat bikin pembalesan sakit hati jang doeloe. Loei Eng berdami sama Tjoe Eng, aken mengoendang orang-orang jang gagah di sa'antero doenia (Tiongkok), dengan perdjandjian barang siapa jang soeka membantoe, Ong-ya soeka membagi-

bagi tanah boewat masing-masing poenja bagian. Sekarang jang soeda dioendang, di Lam-yang-hoe, Tong-hong Liang, jang tergelar Hok-tee-koen-ong; di Siamsay, Tiauw-thian-nia poenja Toa-tjee-tjoe, Ong Kie Sian, tergelar Kim-mo-say-tjoe, Dji-tjee-tjoe—Ong Kie Tjouw, tergelar Tjoei-kie-lin, dan Sam-tjee-tjoe—Ong Giok, tergelar Kim-kiang-siauw-dji-long, sedeng Soe-tjee-tjoe dan Ngo-tjee-tjoe, Hok-bian-poan-koan, Yauw Boen dan Hwa-bian-poan-koan, Yauw Boe, doewa-doewa mendjaga di benteng Yauw-tjong-tjoe, soeda tentoe sadja aken toeroet membantoe djoega.

„Laen dari itoe, masi banjak lagi orang-orang gagah jang soeda berdjandji maoe membantoe, seperti Hwe-poan-koan, Tjioe Liong di Tjioe-keehang, Peng-poan-koan, Tjioe Soei, di Thoo-hwa-kauw, Hoe-i-mo-thoei, Koo Sia, di Tou-liong-phoo, Kim-siang-thauw-tho, Teng Hoei Him di Kim-hong-too, Hok-tee-tay-swee, Tong-hong Beng, di Tay-swee-hong dan Tji-bian-thian-ong, Tong-hong Tjeng, dan itoe semoewa ada orang-orang jang mempoenjai pengaroeh besar sadja, tapi masi ada bebrapa banjak kita poenja kawan-kawan di darat dan aer jang akoe tida bisa inget satoesatoenja. Akoe poenja kadatengan ka sini, perloenja boewat mengoendang pada Lou Toako, soepaja soeka pergi lebih doeloe ka kota Lam-yang-hoe di tempatnja Tong-hong Liang di mana semoewa orang aken pada berkoempoel, laorang soeda menetapkan pada Gouw-gwee tjap-gouw di Pek-see-tan aken didirikan satoe loeitay boewat mamilih orang-orang gagah dan menoenggoe waktoenja kapan Ong-ya maoe bergerak. Belon taee apa Pang-heng taee ini hal apa tida?”

Pang Jan mendengeri Tjoei Liong poenja pem-

bitjarahan jang pandjang-lebar, hatinja merasa sanget girang. Tida njana mengalamken ini bahaja, sabaliknya bisa mendapat taoe di mana adanja Siang-yang-Ong dan dapat taoe djoega begitoe banjak perkara penting.

„Bagoes, bagoes sekali!” kata Pang Jan dengan berpoera-poera. „Sekarang kita taoe ka mana kita moesti menoeedjoe.”

Lou Khay kasi prentah pada orang-orangnja boewat bikin sedia makanan dan minoeman. Pang Jan menoelek dan berpamitan boewat berangkat, tapi Lou Khay menghalangin dan tida maoe lepaskan ia pergi.

„Pang-heng, djangan begitoe,” kata ia. „Akoel dengan mamindjem Tjoei-heng poenja hawa bisa berkenalan dan sekarang djoestroe koetika jang sangat baek boewat kita bergaoelan lebih rapet. Apabila Pang-heng menjelah padakoe, apa boleh boewat akoe tida brani paksaken diri boewat bergaoelan sama Pang-heng jang menganggap berderadajat lebih tinggi dari akoe.”

„Oh, masalah boleh dibilang begitoe,” kata Pang Jan. „Kita orang jang sama-sama membantoe pada Ong-ya, apabila kamoedian Ong-ya soeda naek di tachtta karadjahan, kae dan akoe tentoelah aken mendjadi kawan sadjabat, sama-sama mendjadi mantri dari satoe karadjahan. . . .”

„Tapi, biar bagaimana djoega,” memotong Lou Khay, „akoe harep Pang-heng djangan menoelek lagi.”

„Akoel sendiri tida ada halangan,” kata Pang Jan, „tapi akoe poenja doea kawan ini moesti berangkat doeloelan, sebab kita masi ada bebrapa sobat-sobat jang djoega mentjari Ong-ya, tapi tida taoe di mana iaorang moesti tjari. Maka sekarang perloe sekali moesti lekasan kasi

iaorang kabar, agar iaorang bisa lega pikiran dan tace ka mana marika moesti menoedjoe."

"„Kaloeg begitoe," menjelak Tjoei Liong, „boleh makan minoem doeloe di sini, kamoedian baroe brangkat djoega, masi banjak tempo."

Liong Tho dan Yauw Beng berkata dengan berbareng: „Kita orang tida lapar, ada lebih baik kita brangkat siangan."

„Apabila kae orang bertemoeg sama iaorang," kata Pang Jan, „soeroeg iaorang pada dateng ka sini, sebab Lou Toako poen boekannja orang loewar."

„Baeklab," djawab itoe doewa orang dengan berbareng.

„Apa kita orang poenja sendjata bakal dikasi poelang atawa tida?" menambahkan Yauw Beng.

„Soeda tentoe sadja dikasi kombali," saoe Lou Khay. Sahabisnja berkata ia lantas prentah orangnja ambilin itoe doewa orang poenja sendjata.

„Akoeg poenja dan ini soedara Tjin poenja sendjata," menjelak Pang Jan, „toch boleh dikombaliken pada kita orang, sebab kita sekarang soeda mendjadi sobat satoe dengan laep."

Lou Khay manggoetken kapala dan lantas soeroeg orang-orangnja sekalian bawa Pang Jang dan Louw Tien poenja sendjata. Liong Tho dan Yauw Beng lantas berpamitan dan semoea orang maeg pada menganter, tapi Pang Jan lantas menjegah.

„Akoeg sendiri tida menganter," kata ia, „maka toewan-toewan sekalian poen tida perloe mengantar pada iaorang."

Tjoema sadja sabagitoe lekas itoe doewa orang soeda kaloewar dan orang lagi asik menjeka medja boewat sediaken barang santapan, men-

dadak Pang Jan berlaga berseroeh seperti orang jang dapat inget apa-apa.

„Hei, kadoewa soedara, akoe ada sedikit omongan,“ kata ia. „Apabila kae orang bertemoe sama Sin-hwee-tjiang-koen, Han kie dan It-kie, BiauW Thian Lok”

Berkata sampe di sini ia lantas berdjalan ka-loear. Tida saorang jang menaro tjoeriga ba-hoewa ia berboewat begitoe dengan mengandoeng maksoed laen. Lagian orang-orang jang ia se-boet, semoewanja ada orang-orang dari Ong-hoe jang soeda mati dalem paperangan di Tong-bong-tien. Tatkala ia dateng dekat pada Liang Tho dengan soewara perlahan ia berkata: „Kae pergi katemoeken ambtenaar di ini tempat dan minta iaorang kirim orang-orang ka sini pada djam sapoeloeh boeat membantoe pada kita orang.”

Sahabisnja berkata ia lantas balikin badannja dan masoek lagi ka dalem sembari berkata lagi: „Djangan salah, soeroe iaorang dateng ka sini, kita orang menoenngoe; apabila iaorang tida taoe djalannja, akoe harep sadja kae orang soeka anterken sampe ka sini.”

Lou Khay jang tida taoe oedjoeng poehoennja antas sadja menjeletoek: „Betoel; bawa itoe temen-temen dateng ka sini.”

Hal mana soeda membikin Pang Jan merasa sanget geli dalem hatinja. Begitoeolah semoewa orang pada berdoedoek dan tida lama kamoedian barang santapan soeda disediaken berikoet djoe-ga minoemannja. Lou Khay toewangin sendiri tetamoenja poenja tjawan-tjawan arak. Pada sa-soedanja orang minoem tiga tjawan arak dan makanan dikaloewarken lima matjem, iaorang lantas moelai pasang omong ka Barat dan ka Timoer.

„Kadoewa toewan Kee dan Tio,” kata Pang Jan, „akoe rasa tentoe ada dari kita poenja golongan „hap-djoe” ?”

„Ja, bener ; kita semoewa ada dari satoe golongan,” kata itoe doewa pendjahat dengan berbareng.

„Toewan berdoewa lakoeken „pakerdjahan” di mana ?”

„Kita orang baroe melakoeken pakerdjahan di kota radja.”

„Wah, pakerdjahan di kota radja, tentoelah bisa mendapet kaoentoengan bagoes !”

Dasaran itoe resia maoe terboeka, dengan tida bertjoeriga lagi itoe doewa pendjahat lantas toerkeren iaorang poenja perboewatan di dalem itoe roemah penggadean merk Heng Hin dengan sadjelas-djelasnja.

Pang Jan pikir, ini kabetoelan sekali. Biar poen ia mengalamken satoe bahaja besar, toch mengasi soeatoe hasil jang sanget menggirangken. Pertama ia bisa mendapet taoe tentang di mana adanja Siang-yang-Ong, kadoewa bisa mendapet taoe siapa pendjahatnja jang soeda melakoeken itoe perampokan dan pemboenoehan di kota radja. Sahabisnja berpikir ia lantas kasi tanda dengan lirikan pada Louw Tien kamoedian dengen radjin dan terlaten ia memboedjoek soepaja Lou Khay, Kee Sian, Tio Poo dan Tjoei Liong minoem arak banjakan. Sebab ia berniat bikin mabok marika itoe. Menoenggoe kadatengannja pasoeakan negri kamoedian sama-sama menangep pada itoe kawan pendjahat.

FATSAL X.

Itoe waktoe hatinja Pang Jan merasa sanget girang. Ia pikir, tida sia-sia ia menaloek pada pamerintah dan berloetoet mengangkat goeroe pada Pak-hiap. Sekarang dalem iapoenja pakerdjahan jang pertama sadja, ia soeda bisa berboewat doewa matjem djasa jang tida bisa dibilang ketjil. Boekan sadja ia sendiri boleh merasa bangsa, malah moekanja iapoenja goeroe poen toeroet mendjadi terang. Djoestroe ia lagi kalalap dalem iapoenja pikiran sendiri, mendadak ia djadi tersedar oleh satoe boedjang jang menghamperi dan bitjara pada Lou Khay.

„Toaya, di loewar ada orang jang minta bitjara,“ kata itoe boedjang.

Lou Khay lantas meninggalken perdjamoean sembari maminta ma'af dan lantas kaloewar; berselang brapa lamanja, satoe boedjang laen datang masoek mengoendang toewan Tjoei Liong boewat bitjara di dalem sama iapoenja madjikan.

Tjoei Liong lantas terbangkat dari tempat doedoeknja mengikoeti itoe boedjang masoek ka dalem. Lou Khay oendang Tjoei Liong berdoedoek di sampingnja satoe medja model boelan sabelah, jang ditaro berdempet sama tembok dengan terapit oleh doewa korsi.

„Akoew ada satoe perkara jang hendak minta Toako poenja tenaga bantoean,“ kata toewan roemah. „Itoe orang she Tjin, kawannja Pang Toaya, koetika bertempoer di gredja, telah ditangkep oleh akoe poenja soedara prampoewan. Akoew liat dengen terang koetika iaorang bertempoer, akoe poenja ade prampoewan soeda kateter dan koetika goloknja itoe orang she Tjin

ditoesoeken, apabila diteroesken toesoekan itoe nistjaja akoe poenja ade prampoewan soeda dja-di tiwas djiwanja. Tapi roepanja ia berhati moerah dan tida maoe membinasakan djiwanja akoe poenja ade prampoewan, dari apa bisa dikatahoei, bahoewa ia itoe ada saorang jang berhat' baek dan djoedjoer.

„Baroesan satoe boedjang prempoean dateng ka sini. Boleh djadi akoe poenja ade prempoean memoedji pada itoe anak moeda, maka itoe boedjang prempoean brani bitjara padakoe tentang itoe pamoeda jang gagah, tjakap dan baek hati. Omongan mana soeda membikin mendoesin padakoe. Ini waktoe akoe poenja ade prempoean oemoernja soeda doeapoeloe tahon lehih sedikit; tapi ia masi belon mempoenjai toendangan. Akoe liat itoe orang she Tjin, romannja begitoe tjakap dan djoedjoer di hari kemoedian tentoe ia bakal mendjadi orang besar. Sekarang akoe maoe minta Toako djadi tjomblang bitjaraken oeroesan pernikahan antara itoe pemoeda dan akoe poenja ade prempoean. Tjoema sadja masi belon taoe apa ia soeda mempoenjai toendangan atawa belon, kaloe belon, kebetoelan sekali ini perdjodoan bisa dirangkapken, sebagi djoega soeda ditakdirken oleh Thian jang koewasa.“

Tjoei Liong beroelang-oelang manggoetken kapala. „Kaloe sadja ia belon mempoenjai toendangan, akoe tanggoeng ini oeroesan satoe kali dibitjaraken lantas bisa djadi,“ kata ia dengan segala kasangoepan.

Lou Khay lantas mengangkat kadoewa tangan menjodja pada Tjoei Liong sampe kadoewa tangannja ampir sampe ka moeka boemi. Tjoei Liong poen lantas membales hormat sabagimana pantasnja. Begitoeelah itoe doea orang kombali

berdjalan kaloewar sama-sama, dan itoe orang-orang jang lagi pada doedoek makan, semoewanja pada berbangkit dan oendang itoe doewa orang boeat berdoedoek lagi.

„Akoe poenja tabeat sanget tida sabaran,“ kata Tjoei Liong. „Sekarang akoe mape menanja pada Pang hiantee, apa Tiin hiantee soeda mempoenjai toendangan atawa belon?“

Pang Jan jang tjerdik, dalem sa'at itoe djoega taoe tentoe ada oeroesan penting, makanja orang soeda menanjaken hal itoe.

„Aja,“ kata ia, „akoe poenja sobat ini ada satoe sobat baroe, djadinja akoe tida taoe hal itoe. Soedara, apa kae soeda mempoenjai toendangan atawa belon?“ bogitoelah ia menanja pada Louw Tien sembari kedipken matanja, maksoednja soepaja Louw Tien mendjawab belon. Sebab ia doega keras tentoelah itoe prampoean genit merssa penoedjoe pada itoe anak moeda jang tjakap. Ia mape soeroe Louw Tien poera-poera menjanggoepin boeat menikah, soepaja bisa akalin ambil itoe prampoean poenja barang aneh. Djika itoe prampoean soeda tida mempoenjai itoe barang aneh, dengan gampang sadja bisa tangkap padanja.

Tida taoenja Louw Tien ada saorang djoedjoer jang terlaloe koekoeh sama adat istiadat. Ia poen mengarti Pang Jan poenja maksoed, tapi ia tida bisa poera-poera bilang bahoewa ia belon bertoendangan. Sabaliknja iapoenja paras moeka berubah mendjadi merah seperti tjabe dan dalem bebrapa sa'at lamanja ia tida bisa berkata-kata. Pang Jan mendesak beroelang-oelang, dan dari sebab ia tida mape mendjoesta, lantas sadja ia bilang dengan sadjoedjoernja.

„Akoë boekan sadja soeda bertoendangan,” kata ia, „malah soeda menikah.”

Pang Jan dalem hatinja djadi sangat riboet. Dalem hatinja berkata: „Ini orang soenggoe terlaloe tida ada goenanja. Berdjoesta di antara pendjahat masa boleh djadi apa sih!”

Djawabannja Louw Tien jang sadjoedjoernja soeda membikin Lou Khay djadi poetoës harepan, sabagi djoega kapalanja digoejoer sama aer dingin. Pang Jan dengen paras moeka jang saparo soenggoe-soenggoe dan saparo maen-maen memandang pada itoe toewan roemah.

„Oh, kiranja akoë poenja soedara ini soeda menikah,” kata ia; „tapi akoë sendiri masi belon mempoenjai toendangan. Akoë rasa Tjoei Toako poenja pertanjahan tentoe ada sebabnja. Apa barangkali ada soeatoe oeroesan jang menggirangkan? Akoë sendiri tida merasa maloe boewat oeroesan begitoe. Kita poenja nabi ada bilang: „Perkara tida berbakti ada tiga matjem; tida mempoenjai toeroenan ada jang paling hebat.” Maka sekarang akoë maoë minta pertoe-loengan pada toewan-toewan sekalian jang berada di sini, apabila ada perdjodohan jang menjotjokin, soekalah kiranja toeloeng bitjaraken boewat akoë.”

Sahabisnja berkata ia lantas tertawa bergelak-gelak. Louw Tien lantas memandang padanja dengen mata mendelik dan moeka berengoet. Tjoei Liong lantas berpaling pada Lou Khay.

„Begimana, soedara?” menanja ia.

Lou Khay keroetken halisnja dan golengken kapala sedikit. Samentara Pang Jan jang merasa ingin sekali tipoe dan dapetken itoe barang aneh jang digoenaken oleh itoe gadis, roepanja tida maoë moendoer dan mendesak.

„Kaoe berdoewa djangan bitjara seperti orang lagi maen bade-badean,” kata ia. „Kaloe ada pembitjarahan apa-apa, mengapa tida maoe di-bitjaraken dengan teroes-terang sadja?”

Tjoei Liong jang koerang akal, terpaksa lantas toetoeerken dengan teroes-terang apa jang iaorang soeda damiken, tadi koetika di dalem.

„Ade prampoewannja Lou Toako maoe di-toendangin sama Tjin hiantee,” kata ia, „tapi sajang sekali Tjin hiantee soeda beristri. Itoelah boekannja perkara maen bade-badean.”

„Aja, aja,” kata Pang Jan jang berlaga salah denger orang poenja omongan, „itoe oeroesan akoe tida brani bitjaraken; akoe ini orang dari golongan apa, tjara bagimana brani bikin perhoeboengan familie sama koelawarga jang berderadjat tinggi!”

Omongannja Pang Jan jang sengadja maen gila, soeda membikin Lou Khay djadi bingoeng dan tida taoe moesti mendjawab bagimana.

„Djika menoeroet akoe poenja pemandangan,” kata lagi Tjoei Liong, „Pang Toaya tida bisa ditjela,”

„Tida, tida boleh,” memotong Pang Jan. „Akoen ini orang bangsa apa. Perkara pernikahan moesti satoe sama laen poenja deradjat berimbang, dan kaloe perampoewannja eilok moesti bersoewami pada laki jang tjakap. Masatah pantas djika gowak di pasangin sama boeroeng Hong? Tjoei Toako boleh tida oesa bitjaraken teroes ini oeroesan, sebab tjoema aken membikin akoe merasa maloe pada bajangan sendiri sadja dan tida ada moeka boewat berdiam lebih lama di sini.”

Ini omongan jang dioetjapken satjara tjerdik, soeda membikin Tjoei Liong dan Lou Khay

djadi merasa tida enak, sedang Tjoei Liong jang goblok lantas sadja dengan soenggoe-soenggoe berfibak pada Pang Jan.

„Kaloe menoeroet akoe poenja pendapatan,“ kata ia, „soedara poenja ade prampoean oemoer-nja soeda besar, dan kita orang tida lama kamoedian aken mengikoet perang pada Ong-ya, dengan begitoe, kaloe ade ditinggal sendirian di roemah tentoe koerang bagoes, sabalijnja, masatah maoc dibawa ka medan perang jang soeda tentoe sadja terlebih lagi tida baeknja? Maka tida lebih baik bikin beres ade prampoean poenja oeroesan pernikahan, soepaja kae djadi terlepas dari tanggoengan besar. Apabila ini oeroesan soeda dibikin beres, nistjaja kae bisa mengikoet perang pada Ong-ya dengan soenggoe-soenggoe hati.“

Lou Khay jang tida berpikiran pandjang, achirnja kena djoega dibikin tergerak hatinja oleh Tjoei Liong poenja desekan. Tjoei Liong mendesek lagi beroelang-oelang dengan berbagi-bagi perkatahan jang enak kadengerannja.

„Ja, baeklah, kita boleh atoer begitoe sadja,“ kata Lou Khay achir-achir,

„Bagoes sekali!“ kata Tjoei Liong. „Perkara djodo boekannja menoeroet manoesia poenja kamaoean, hanja memang soeda ditakdirken oleh Thian. Akoe jang mendjadi tjomblangnja, tapi siapa jang jang mendjadi penangoengnja? Akoe harap sadja kadoewa soedara Kee dan Tio soedi mendjadi penangoengnja. Sebab ini oeroesan poen ada soeatoe perkara baik.“

Kee Sian manggoetken kepala menjataken satoedjoenja; tapi Tio Poo golengken kapala.

„Akoe tiada bisa,“ kata ia, sebab selamanja akoe tida taoe tjampoer perkara jang saroe pa ini.

Maka akoe harep sadja toewan-toewan djangan mendjadi goesar."

Tio Poo makanja tida maoe mendjadi penangoeng ada sebabnja. Ia seringkali dateng ka roemahnja Lou Khay dan lantaran ia dianggep sebage sobat baik, djadi tida menjingkir dari Lou Khay poenja koelawarga prempoewan, ia seringkali bertemoe sama Lou So Tjin dan boekan djarang iaorang soeka pasang omong dengan oeppek. Tio Poo liat kaloe So Tjin lagi bitjara padanja seringkali maen mata dan oendjoek iapoenja tingga lakoe jang genit. Maka ia sendiri soeda mengandoeng niatan boewat melamar pada itoe gadis, tjoema sajang ia tida bisa mendapet koetika jang baik, sedeng ia sendiri merasa berat boewat memboeka moeloet dengan langsoeng.

Sekarang dalem perdjamoean makan ia meliat Tjoei Liong teroes-meneroes mendesak Lou Khay soepaja kasiken ade prampoewannja pada Pang Jan, soeda tentoe sadja hatinja merasa sanget tida senang. Tapi, sabaliknja orang maoe minta ia mendjadi toekang tangoeng, soeda bisa dimengarti jang ia tida nanti soedi lakoeken hal itoe. Kaloe boleh dan bisa, ia merasa ingin sekali bikin ini oeroesan djadi gagal, baroelah hatinja merasa senang.

"Kaoe, Kee Toako bagimana, apa soeka mendjadi toekang tangoeng?" menegasken Tjoei Liong, koetika meliat Tio Poo tida maoe. "Apabila kaoe poen tida soeka, terpaksa akoe sendiri jang aken merangkep mendjadi penangoeng djoega."

"Akoer tida ada kababatan dan soeka mendjadi penangoeng," djawab Kee Sian.

"Sekarang bagimana, Lou Toako, apa soeka bikin beres ini perdjodoan?" menanja Tjoei

Liong pada toewan roemah. „Tjomblang dan penangoengnja semoewa soeda sedia, tjoema tinggal menoenggoe diberesken sada.“

„Ja, akoe soeka,“ djawab Lou Khay.

„Pang Toaya,“ kata lagi Tjoei Liong, „sekarang kae djangan menjindir lagi padakoe, dengan membilang segala gowaklah, boeroeng honglah, begini dan begitoe, semoewanja omong kosong sadja. Kaloe menoeroet akoe poenja pemandangan, ini perdjodoan djoestroe ada sangat sembabat, tjoema itoe nona adatnya ada sedikit tinggi dan angkoeh. Tapi enaknya tida mempoenjai mertoewa lelaki atawa prampoewan dan djega tida mempoenjai barang satoe ipar prampoewan. Sedang iapoenja paras jang elok dan tjantik, soeda tida oesa dibitjaraken lagi. Malahan kae ini waktoe ada bakerdja pada Ong-ya, bila kamodian itoe pakerdjahan besar bisa berhasil, tentoelah kae aken mendapat djabatan jang tida ketjil. Sekarang djangan bengong sadja, lekasan kasiken barang pandjernja.“

„Ach, kae ini sasoenggoenja bisa mamikir dengan sampoerna betoel,“ kata Pang Jan.

„Akoek boekannja mengeboel, biar poen soeatoe 'ma tjomblang jang paling bisa mengomong tida nanti bisa menang sama akoe.“

Pang Jan lantas kaloewarken satoe batoe giok jang di-ikatken pada iapoenja tali pinggang dan dipasrahken pada Tjoei Liong, oleh siapa kamodian dengan kadoewa tangan diangsoerken pada Lou Khay.

„Menerima pandjer haroes terboengkoek oleh satoe lembar kertas merah, baroelah tjotjok dengan atoeran,“ kata ia, „tapi sekarang di mana moesti tjari itoe matjem kertas?“

„Ach, kaeo ini terlaloe banjak tjingtjong,” kata Lou Khay

„Boekannja begitoe, atoeran tida boleh diboe-wang.” Kamoedian ia berpaling pada Pang Jan dan menambahkan: „Pang-ya, mari sini, kaeo orang sekarang moesti mendjalanken peradatan, jang menandakan soeda teriket mendjadi satoe familie.”

Begitoelah iaorang lantas djalanken peradatan mengakoe familie, jang satoe menjeboet „Toakoe” dan jang laen membahasaken „Moayhoe”.

„Bagoes!” kata Tjoei Liong dengan goembirah. „Sekarang kaeo orang soeda mendjadi Toakoe dan Moayhoe.”

Kamoedian satoe sama laen lantas pada berdoedoek kombali di masing-masing poenja tempat doedoek. Tjoei Liong dan laen-laen orang pada menghatoerken slamat pada itoe doewa jang baroe ikat perhoeboengan familie.

„Pang Toaya, sekarang oeroesan soeda mendjadi beres,” kata Tjoei Liong, „kaeo maeo hatoerken trima kasi apa pada jang mendjadi tjomblang?”

„Itoelah soeda sedia,” kata Pang Jan; „araknja akoe poenja Toakoe akoe maeo toewangin tiga tiangkir pada Toako, sabagi akoe poenja tanda trima kasi.”

Semoewa orang djadi tertawa besar mendenger omongannja Pang Jan.

„Masi ada soeatoe hal jang menjoesaken,” kata lagi Pang Jan. „Akoer dan akoe poenja kawan ini tida bisa menoenggoe lama di sini, besok djoe-ga akoe maeo pergi mentjari pada Ong-ya di negeri Leng-hee, soepaja bisa mamilih hari baek boewat gerakan balatentara menjerang pada karadjahan Song. Sedang itoe paperangan belon

tentoe bisa djadi beres dalem tiga ampat tahun, malah boleh djadi djoega sampe belasan tahun, belon djoega bisa merampas negri Song poenja karadjahan. Oleh kerna itoe, djadi tida taoe sampe kapan ini pernikahan baroe bisa dilakoeken. Maka ini hal, haroes sekali ditanjaken dengan terang pada Toakoe, kapan itoe pernikahan bakal dilakoeken. Tjoema sadja dalem tangsi tida di-idjinken orang menikah."

„Kaoe poenja omongan ada benar djoega," kata Tjoei Liong, jang lantas memandang pada Lou Khay dan berkata lagi: „Lou Toako kaoe pikir bagaimana?"

Lou Khay lantas keroetken halisnja.

„Terpaksa moesti minta „Moayhoe" tinggal lamahan di sini," kata ia, „boewat menoenngoe sampe bisa dipilih satoe hari jang baek dan te-roes menikah."

„Itoe tida bisa," kata Pang Jan. „Akoel asal sadja mendapat taoe Ong-ya berada di mana, kaloel sadja akoel ada mempoenjai sajab, [tentoe-lah akoel soeda lantas terbang menjoesoel, soepaja bisa lantas bertemoel sama Ong-ya. Lagian Ong-ya selamanja tida boleh berdjaoehan sama akoel."

„Djika maoel dibitjaraken prihal akoel poenja koelawarga," kata Lou Khay, „akoel ada mempoenjai doewa empe; tapi sadari lama iaorang soeda pindah ka laen tempat dan tida taoel bikin perhoeboengan satoe apa. Laen dari itoe akoel tida mempoenjai laen familie jang dekat, Oleh kerna begitoe, tida ada halangannja ini oeroesan diatoer dengan lekas. Maka dalem satoe doewa hari ini boleh soeroel orang tjari hari baek dan lantas lakoeken itoe pernikahan soepaja akoel boleh terlepas dari tanggoengan besar. Lagian akoel poen maoel brangkat ka Lam-yang-hoe."

„Apatah perloenja mentjari orang boeat mentjari hari,” kata Pang Jan, „akoe sendiri poen bisa.”

„Itoe telebih baik lagi,” kata Tjoei Liong, „djadi tida oesa memboewang banjak tempo.”

Sahabisnja berkata ia lantas soeroe orang mengambil satoe boekoe lak-djit, jang lantas di samboeti oleh Rang Jan boeat dipreksa. Kabetoelan sekali ini hari djoestroe ada Hong-too-kiadjit alias hari jang baik dan beroentoeng.

„Ini hari djoestroe ada hari baik,” kata Pang Jan. „Apabila saliwatnja ini hari, sahingga sa-tengah boelan kamoedian masi tida ada lagi hari jang baik, malah semoewanja ada banjak sekali halangannja.”

„Nanti atawa sekarang ini oepatjara pernikahan sama sadja moesti dilakoeken,” kata Tjoei Liong; „maka lebih baik ini hari sadja dilakoeken, sebab djoestroe djato hari jang sanget baik. Dengan begitoe, biar poen kita mengiring perang pada Ong-ya, toch ade prampoewan bisa sama-sama toeroet ka dalem tangsi sama soewaminja. Lagian ia ada mempoenjai ilmoe kapandean jang begitoe tinggi, dengan apa ia bisa membikin djasa-djasa dalem paperangan. Boekantah ia aken mendjadi satoe pendekar prampoewan? Sabalijnja djika ia belon menikah, itoe hal tida nanti bisa dilakoeken, sebab ada banjak sekali halangannja.”

Lou Khay memangnja ada saorang jang tida mempoenjai pikiran sendiri jang tetep, tapi itoe waktoe mendenger Tjoei Liong poenja omongan jang begitoe enak sebaliknja ia djadi binggoeng dan tida taoe apa jang ia moesti berboewat. Tambahan Tio Poo di satoe pinggirian teroes-meneroes bikin bantahan, kerna ia me-

mang ingin sekali soepaja itoe oeroesan bisa djadi gagal.

„Ini oeroesan menika jang besar,“ kata ia, „mana boleh diatoer setjara begitoe poenja saderhana. Lagian Lou Toako jang mendjadi kapala familie, sedikitnja moesti kasi taoe pada semoewa tetangga dan moesti bitin rame-rame, sedeng kemanten prempoewan djoega haroes djoedoe di dalem djoli penganten dengan dianter oleh saprangkat tetaboean. Dengan begitoe, baroelah tida membikin katjiwa Lou Toako poenja dera-djat.”

„Dalem ini oeroesan kita tida boleh memake pemandangan jang saroeapa itoe,“ kata lagi Tjoei Liong jang membelar teroes. „Penganten lelaki saorang pengoembarahan jang tida mempoenjai roemah tangga di sini, sekarang djika maoe soeroe kamanten prampoewan naek djoli dengan di'iringken oleh saprangkat tetaboean, itoe djoli kamanten maoe digotong ka mana? Kaloe boekannja begitoe, tentoelah moesti sediaken satoe roemah boewat djadi tempat-tinggalnja penganten lelaki, di mana moesti disediaken segala perabotan jang perloe dan mas kawin. Itoe semoewa tida lebih tjoema boewat kaliatannja „teebian“ sadja, tapi oewang jang dikorbanken djoemblanja boekan sedikit. Perkara oewang masi tida sabrapa, tapi perkara mengiring pada Ong-ya ada soeatoe oeroesan besar. Malah kaloe boekannja lantaran ini oeroesan besar, apatah perloenja moesti begitoe terboeroe-boeroe dan itoe oepatjara nikah moesti dilakoeken dalem hari ini djoega? Perkara jang saroeapa ini, sadari doeloe-kala seringkali terdjadi, jaitoe jang dinamaken „poengoet-mantoe.”

„Apa betoel boleh diatoer begitoe sadja ?“

menegaskan Lou Khay jang tida mempoenjai katetepan pikiran sendiri.

„Soeda tentoe sadja boleh sekali,” menetapken Tjoei Liong.

„Kaloe boleh, baeklah atoer sadja begitoe,” kata Lou Khay.

„Djika maoe diatoer sekarang moesti lekasan kasi kabar pada orang di dalem,” kata Tjoei Liong, „soepaja orang bisa bikin persediaan segala apa jang perlee.”

Lou Khay manggoetken kepala dan soeroe satoe boedjang kasi kabar ka dalem, nona So Tjin moesti diriasin dan dipakeken pakean kamanten dan malem aken dilakoeken oepatjara sembahjang pada Thian dan bertemoenja kadoea penganten. Di laen fihak ia kasi prentah pada bebrapa boedjang laen boewat bikin persediaan segala kaperloean sembahjang, seperti hio, lilin, kertas, medja samkay dan sebagainya. Sedeng ia sendiri poen lantas menoekar pakean baroe dan bagoes boewat hadepken itoe pesta pernikahan.

Louw Tien pergi mengaso di dalem satoe kamar boekoe, jang letaknja di sabelah loewar. D-laen fihak, Tio Poo koetik Kee Sian dan diajak pergi kaloe ar boewat pasang omong di tempat jang tida ada orang. Sedeng Tjoei Liong si tjomblang membantoei Lou Khay mengoeroes segala kaperloean pesta, bingga iaorang djadi sangat repot. Louw Tien koetika meliat tida ada orang laen, lantas menanjaken pada Pang Jan mengapa melakoeken perkara jang saroe pa itoe.

„Kaoe gila barangkali, Pang Toako,” kata Louw Tien dengen soewara koerang senang. „Apa perkara menikah boleh diboewat maenmaen? Tadi di hadepan orang banjak akoe tida

bisa menjaga pada kae. Orang jang seperti kita, masatah mae mendjadi soewaminja satoe prampoewan jang mendjadi ade prampoewannja orang jang seperti Lou Khay?"

„Och, kiranja kae masi belon mengarti akoe poenja maksoed," kata Pang Jan dengen tertawa. „Apa kae kira akoe kapengenan mendapat istri jang begitoean? Akoe berboewat begini, tida laen tjoema ingin dapetken itoe prampoewan poenja barang aneh jang bisa membikin orang djadi djato pangsang, djika ia keboetken barang itoe di hadapan orang poenja moeka. Akoe ampir tida mae pertjaja jang kae tida taoe bahoewa akoe berboewat begitoe perloenja tjoema hendak tipoe iapoenja barang aneh itoe. Sebab djika kita tida bisa dapetken iapoenja barang aneh itoe, nistjaja kita orang aken kena tertangkap oleh ianja."

„Ja, sekarang akoe soeda mengarti," kata Louw Tien. „Tjoema sadja kae haroes sekali dari moeloet teroes ka dalem hati, djangan mabok pipi litjin lantas meloepaken perkara besar."

„Apabila akoe poenja omongan tida teroes ka kalem hati, biarlah akoe mati dengen tida mendapat tempat boewat mengoeboer."

„Boekannja akoe tida pertjaja. Akoe tjoema koewatir sadja kae poenja pikiran djadi bergontjang kerna pengaroehnja paras eilok."

„Apabila kae denger di sabelah blakang ada soewara riboet-riboet," kata Pang Jan, „akoe harap kae soeka lantas dateng membantoe, sebab akoe poenja ilmoe kapandean sangat berwates. Djangan membikin akoe sampe mendapat kasoekeran dari marika itoe."

Tatkala iaorang lagi pasang omong, satoe boedjang dateng masoek kasi taoe, bahoewa seka-

rang soeda sampe waktoenja boewat „ba-mantoe“ pergi mandi dan toekar pakean penganten. Pang Jan lantas mengikoeti itoe boedjang masoek ka blakang boewat mandi. Pada sasoedanja ia bikin bresih iapoenja badan, lantas ia menoekear pakean baroe dan kaloewar ka pertengahan, di mana soeda menoenngoe Tjoei Liong dan Lou Khay, jang antara ia ka hadapan satoe medja samkay. Tida antara lama kamoedian dari dalem kaliatan kaloewar bebrapa boedak prampoewan jang membawa teng soetra, kamoedian di sabelah blakangnja berdjalan kamanten prampoewan dengan moeka tertotoep dan dipimpin oleh satoe boedjang prampoewan.

Pang Jan bersama itoe kamanten prampoewan lantas sembarang dengan berbareng di hadapan itoe medja samkay, kamoedian iaorang dianter masoek ka dalem kamar penganten, jaitoe kamarnya Lou So Tjin sendiri, di mana kamanten prampoewan melepasken iapoenja totoepan moeka, boewat minoem arak dengan satoe sama laen menoekear tjawan. Begitoelah Pang Jan berdiam teroes dalem itoe kamar kamanten. Sedang itoe boedjang prampoewan, jang tadi memimpin kamanten prampoewan, djoega lantas moendoer kaloewar dari itoe kamar.

Lou So Tjin sekarang baroe meliat tegas pada iapoenja kamanten lelaki, hal mana soeda membikin ia djadi sangat terkedjoet, la toendoekin kepalanja dengan mengelah napas perlahan. Ia merasa heran sekali mengapa iapoenja engko boleh djadi begitoe tida kaoeroesan. Sebab orang jang ia penoedjoei ada itoe pamoeda gagah dan tjakap, tapi sekarang orang jang mendjadi iapoenja soewami ternjata ada saorang laen, jang boekan sadja ilmoe kapandeanja tida tinggi,

malah iapoenja roman poen tida tjakap, lagian oemoernja poen soeda toewa djoega. Orang jang seperti ini sedikit poen tida ada bagian jang boleh dikagoemin. Soenggoe tjilaka sekali akoe poenja peroentoengan saemoer hidoep djika moesti dipasrahken pada ini manoesia. Apa barangkali itoe boedjang prampoewan soeda bitjara salah? Tapi, biar bagimana djoega ini waktoe ia tida bisa bikin perbantahan lagi, sebab iaorang berdoewa soeda sama-sama sembahang di hadapan medja samkay. Tegasnja itoe perkara pernikahan soeda mendjadi beres, sekali poen ia tida satoe-djoe djoega, soeda kasep.

Itoe waktoe ia djadi sangat mendongkol dan tida maoe trima oentoeng. Ia berniat pasti maoe tangkap kamanten lelaki poenja kasalahan, tida perdoeli apa djoega adanja kasalahan itoe, satoe kali ia dapatken djalan, lantas sadja ia maoe oendjoek kagoesarannja dan dengen zonder banjak bitjara lagi ia maoe boenoeh mati pada ini lelaki jang ia tida soeka.

FATSAL XI.

Itoe sapasang kamanten, doea-doeanja mengan-doeng niatan jang koerang baik. Fihak prem-poean lantas meliat Pang Jan boekannya Louw Tien, hatinja merasa sanget gemes dan djengkel. Sedeng Pang Jan, jang memang boekan soeng-goe-soenggoe maoe mendjadi soeaminja itoe Kioe-bwee-sian-ho jang genit, hanja ingin tipoe orang poenja wasiat. Koetika meliat Lou So Tjin oendjoek iapoenja paras moeka jang tida manis, lantas sadja ia mendapet taoe, bahoewa ini prem-poean genit tida soeka padanja. Tapi ia ada sampe tjerdik dan bengal, sebaliknja ia oendjoek moeka manis dan mengangkat tangan menjodja sampe ampir mengenaken djoebin.

„Nona,“ kata ia, „akoe she Pang dan bernama Jan. Sedari lama akoe bekerdja pada Ong-ya. Tida njana blakangan ini Ong-ya poenja pekerdjahan djadi gagal, hingga akoe djadi terpen-tjar sama akoe poenja djoengdjoengan itoe. Apabila boekannya ini waktoe Ong-ya berada di negri Leng-hee, nistjaja akoe tida nanti tega berpisah-han sama kaoe, nona. Tapi akoe poen tida bisa lama-lama berpisah-han sama akoe poenja djoeng-djoengan. Samentara kaoe sama akoe, dasaran soeda ditakdirken moesti berdjodo, maka ini hari kita bisa terangkap mendjadi satoe. Itoelah akoe poenja kaberoentoengan jang boekan ketjil. Tadi siang akoe meliat nona poenja ilmoe kapandean ada begitoe tinggi, jang ada soeroep sekali djika dikasi gelaran pendekar prempoean. Ini hari lantaran kaoe soeda berdjodo sama akoe, mendjadi kawan saemoer hidoep, akoe ada nia-tan ingin berladjar ilmoe silat pada nona. Belon taoe apa nona soedi mengadjar atawa tida? Ka-

loe soeka, sekang djoega akoe maoe mengang-
kat goeroe pada kaoc."

Lou So Tjin mendenger Pang Jan poenja omo-
ngan jang begitoe marendah, hatinja djadi lem-
bekan sedikit. Ia pikir ini orang biar poen tida
terlaloe tjakep sabagaimana itoe pamoeda, tapi
iapoenja tabeat tentoe sekali sabar dan manis.
Djika diliat dari iapoenja pembitjarahan jang
begitoe roepa, biar poen akoe hendak mentjari
iapoenja kasalahan, taro kata ia maoe kerasken
djoega hati boewat memboenoeh pada Pang Jan,
ia merasa tida tega berboewat begitoe. Achirnja
ia djadi berbalik berpikir, apa boleh boewat, le-
bih baek akoe menerima oentoeng sadja, dasaran
akoe poenja peroentoengan tjoema sabagini, ja
moesti trima sadja, apa jang nasib kasiken. Oleh
kerna mamikir begitoe, Lou So Tjin berbalik dja-
di girang dan oendjoek iapoenja moeka manis.

„Siangkong doedoeklah," kata ia. „Lagian dji-
ka bitjara djangan terlaloe marendah begitoe
roepa."

(Ada samboengannja).